

محمد إبراهيم

ريوان بالعامية المصرية

# الْحُزْنُ الْبَعِيدُ الْخَادِي



دار دُون

تحميل الكتاب بجودة عالية

ابحث عن

ريبو الكتب  
book-spring.com

## مقدمة بخط الشاعر أمير طعيمة

كثير من هم من يكتبون الشعر، ولكن قليل من هم من  
يستطيعون أن يكتبوه أو يقرأوه أو يقرأوا بل كما تقدم  
محمد إبراهيم.. هذا الكتاب العشريني القادم من المحلة  
الى نوحام القاهرة هامللا مع كنز من الكلمات التي تعبر  
عن أحلامه وأحلام الجيل بأكمله بحيث عن الفرحة للقبيل  
عند ما يراه.

في أشعاره مزيج نادر بين الحلم والواقع، الحقيقة والخيال  
في لغة عالية بسيطة لا تخلو من فلسفة تأمل في الحياة  
في شعر أحمد ما يوهب به هو السهل الممتنع.

بكل الفخر أقدم لكم ديوانه الجديد: الخبز البعيد الهادي  
لنرى أحلامه وأرجائه في بانوراما شعرية متغيرة  
ولنشاركه نهر من المواهب الفذة نهر لا ينضب.

(زيد الهادي)

## إهداء

إهداء..

ل أمي اللي بحس إنها أختي.. وأختي اللي بحس إنها أمي.. وبنتي اللي هتبقى حبيبتي، وحبيبتي اللي هتبقى كل دول..

ل أختي «مها» وجوزها و«عمر» و«حمزه» ولادها.

ل «أحمد» أخويا: ابني الكبير.. اللي يا رب أشوفه أحسن مني.

ل أبويا: أجدع صاحب شفته ف حياتي.

ل جدتي: السما اللي طلعت للسما.

لحب حياتي أو بين قوسين «إسراء»

البنيت دخلت قلبي وقفلت على نفسها من جوا.. وكسرت المفتاح

البنيت اللي اديتها كل حاجة.. وادتني ضهرها ومشيت.

البنيت اللي كنت على أتم استعداد أموت علشانها في الوقت اللي

رفضت فيه تعيش علشانني.. إنتي أصبح غلطة ف حياتي.. ولو رجع الزمن

بيا مغلطها تاني بس الفرق الوحيد إنني مش هسيبك نمشي..

ل «أسامة» جوز أختي الصغيرة: خدت ن عيني ف خطها ف ن عينك..

ل «وليد» ابن خالتي: أو بين قوسين راعي طفولتي الرسمي.

ل «إسماعيل فتحي»: صاحبي اللي أنقذ حياتي مرتين.. ويا ريتته ما عمل

كده.

ل «أحمد النشار»: المعنى الحقيقي لجملة «سرك في بير».

ول «محمد حياظه»: المعنى الحقيقي لكلمة «صاحب صاحبه»

ول «هادر حسام»: صاحبي اللي مبيعطش.. مبيعطش خالص.

ل «إسلام» ول «مايكل»: أناتيمي بين الجدعنة والفشل الدراسي،  
ل «أسامة الهادي»: صاحبي اللي كتفه ف كتفي بيخلييني مطمئن.  
ل «هاني سرحان»: صاحبي وصاحب «أسامة» اللي كتفه ف كتفنا إحنا  
الاتنين.

ل «عبيدة»: الجندي المجهول والرجل المناسب في المكان المناسب.  
ول «سعد العود»: رفيق الكفاح.. والإيد اللي ف إيدي من واحنا نعت  
الصفير.

و ل «عادل صقر» و «محمد عادل»: زمايل عمري في الجامعة.

ل «أمنيه حسن» ول «زهرة»: شكراً لأنكم في حياتي.

ل «أنغام»: مشروعني الفني.. وحلم حياتي.

ل «دعاء عبد الوهاب»: مصدر سعادتي.. والمادة الخام لكل حاجة  
حلوة خلقها ربنا.

ل «دينا صادق» ول «مرودة جمال الدين» و «داليا رشوان»: عندما تكون  
المهدئات على هيئة بشر.

ل «مصطفى إبراهيم»: الإيد اللي زقتني لعالم العامية من غير ما تعرف.

ل «أحمد الراوي»: ابني اللي أكبر مني سنّاً.

و ل «أحمد الطحان»: أبويا اللي أنا أكبر منه.

ول «عمرو سليمان»: صاحبي اللي أنا شبيه شكلاً وموضوعاً أكثر من  
أخوه التوام.

ل «نبيل عبد الحميد» ول «مصطفى عاطف»: الاتنين اللي يا ربنا الناس  
كلها زهم.

ل «أحمد النجار»: «لو كان بإيدي أكون.. أنا من زمان كنتك»

شكراً.. إنتم سبب مهم في اللي وصلت له بعد إرادة ربنا.

## إهداء لـ «نفسي»

كمية الحزن اللي جواك.. كانت أكبر من إن أي حد يخرجك منها.. كل اللي كان بيحاول يخرجك من اللي انت فيه.. كان بيدخل معاك.. كأنكوا ف دوامة أو فرمال متحركة.. زيك زي أي كوباية اتكسرت.. وكل اللي كان بيحاول يلمها كان بيتعور.. كل اللي كان بيحاول يحبك كان بيكرهك.. أو بيكره تصرفاتك الغير مسؤولة والغير منطقية والغير مبررة بالمرة.. مش لإن تصرفاتك كده فعلاً.. لا.. لمجرد إنهم شايفينها كده؟؟

كلهم مشوا.. وسابولك الديوان ده.. عشان تدبه لناس تانية تلف معاك نفس الدائرة ويسيبولك ديوان بعده.. وكانك عايش عشان تكتب وتكذب لناس، وعلى ناس بسبب ناس تانية خالص..

كل اللي اتبقى من 2014 شوية صحاب فكة.. و شوية فلوس فكة.. وشوية دروس فكة.. وشوية كلام جواك متقالش واتكتب.. وكلام اتقال ومنكتيش.. وناس بعيدة قريبة.. وناس قريبة بعيدة.. مش دايم الأحزان وجع.. ولا دايم النهايات سعيدة.

## مقدمة

لبكره أنا لسه شايفه طشاش  
ولمرا تي اللي ماعرفهاش  
ولولادي اللي لسه مجوش  
وللناس اللي مفتكروش  
يعزوتي ف موتي زمان  
لكلمة سيبها بظروفها  
وكلمة: لسه بالإمكان  
ولاخواتي اللي مهتموش  
بفكرة إني بكتب شعر  
ولا صحابي اللي حطوا اصفار  
ف خانة السعر  
يوم ماتبعنا واتودعت  
لإيد أمي اللي سنداتني  
ف يوم ما وقعت  
ف تاتا وخطوة خطيتها  
لكل إزارة رجيتها  
عشان الصودا منها تروح  
لقعدة فوق سطوح بيتنا  
وكات ريحة الريحان بتفوح  
لسور المدرسة العالي

عشان علمني اعدّي السور  
لفكرة إني مش بعرف  
أعيش زي البشر في النور  
ومجموعي اللي عمره ما كان  
كفاية عشان اكون دكتور  
لستي اللي نسي يتعدّ  
لدمعة فرحة نازلة بجد  
لذكرى بنت حبيتها  
مجاش فيه بنت مطرحها  
لضحكة حزن في فرحها  
وانا واقف مع المعازيم  
لنصي الأبيض اللي الوقت  
مسابش ف وشه جزء سليم  
لصوت «فيروز» «نجاة» و«حليم»  
وصوت «أنغام»  
وأخر مرة اشوف «إسراء»  
وينزل من عنيا كلام  
على هيئة بكا بغباء  
لكل الماضي والأشواق  
لكل اللي انتهى فجأة  
وكل اللي ابتدى صدفة  
لكل نهاية مش هادفة  
وكل حكاية مش بتطول  
أنا حابب باني أقول



مفیش فی الدنيا شیء ثابت  
مفیش ولا حاجة علی حالها  
مفیش فی الدنيا إید سابت  
حاجات إلا ما جه بدالها!

یتبع

محمد إبراهيم

عیش و ملج

## رسائل م السما السابعة (ج - 2)

(١)

ولسّه ف حلمي بتجيلي..  
وبحكيها وتحكيالي..  
عن الدنيا وسنواتها..  
عن الجنة اللي دخلتها..  
تجيب تفاحة تقسمها..  
تدوّقني وأدوق وإن دوقت..  
يموت ضيقي..  
تبلّ بحضنها ربي..  
أسيبها وروحي رايحالها..  
تسيبني وهيا بتعيط..  
وأقوم من حلمي كالعاد  
بدور ع الحياه ف ميت!

(٢)

بعد بُعدك عني فعلاً  
كنتي أقرب مما كنتي  
كل حاجة عبارته عنك..

كل حاجة بشوفها إنتي  
سايبة ربحتك بين هدومي  
سايبة قلقك بين همومي  
سايبة أيامك ف يومي..  
وذكريات ملهاش نهاية..  
سايبة صوتك بيحاوطني  
سايبة صورتك في المرآة  
سايبة حاجة ف كل حاجة  
رغم إنك مش معايا!

(٣)

ماشيين بدعاكي وكله تمام..  
ولو ان الحال مبقاش ولا بد..  
بقى شكل البيت بعدك بيخض  
وكان البيت عجز فجأة..  
أو جاله زهايمر ف غيابك..  
معرفش بيبيكي عشان سبتيه  
أو هو بيبيكي عشان سابك  
كان بينكو علاقة انا مفهمه  
ومكنتش بيها زمان مهتم  
ده لأن البيت مش بس حيطان  
ولأنك بيت من لحم ودم..

(٤)

بقيتي حقيقة زي الموت وكاس داير..

بقيت بتنفسك خنقة..

وضيقة وحيرة وسجاير..

بقيت أضعف من الأول

بقيتي ف منتهى القوة..

بقيتي مراية مش بتقول..

غير كبرت من جوا..

بقيت ببرد وانا ف حضنك..

كأني ف ليلة ف يناير

مفيش ولا شيء أنا ضامنُه

بقيت عايش مبطمّنش

كأن الدنيا جيم دومينو

وبلعب بس مبضمّنش

لقيت كل اللي كان بينا

سراب قرّبتله اتبخر

كأنك كُنّتي غيبوبة

دخلتك فُقت متأخر

(٥)

ريحتك بتيحي في المكان بالليل أوي!

وتأخذني م الضلمه لمكان شيهك كده..

برتاح هناك من غير سبب!

خلص الكلام..

بدأ السكوت يدخل شفائفي عشان أنام..

الليلة ليه كل الأماكن

فيها منك شيء وروح..

وبحس ضلك ع الحيطان

وبحس نفسك في الهواء..

مع إننا محناش سوا

الليلة ليه كل الأماكن..

فيها بيطول انتظارك..

فيها ضحكة من هزارك

فيها رجة بن قهوة

فيها عُقب سيجارة والع..

لسه سلم بيتنا واقف..

في انتظارك وانت طالع

لسه مفاتيحك مكانها..

ولسه ساعتك فيها نبضة

لسه ع الكومودينو سائب

سبعة لولي ودبلة فضة

كل حاجة سيهالي..

رغم غيابك هنا هنا

بس برضه بعد منك

لسه واقفة الدنيا هنا

(١)

إن كنت متشفي يا ريت..

ياخذ أياك ماي..

والضحكة التي بتضحكها

في الصورة التي على الحائط

لا تسب ريحتك في الأرضة

ولا حتى صوتك في البيت

لا تسب عكاز وكوفية

ولا دخان عُقب سيجارة

ولا شيء من شغلك فينا

ولا خزان ولا نظارة..

ولا باقي شوية شاي..

ولا فكرة في جيب جلابينك

خذ كل البيت لو ماشي..

أو خذ روحك من بيتك..

خذ كل الماضي معاك..

والعُقب وأنا مش داري

من عايز موتك يبقى

ليه دموع ووداع تكرراري

وأنا فني بفعل الوقت..

أو معمل إني نسيت..

خذ بالكمال تفاصيلك..

والأرضي بكل هدوء..

يا تاخدني معاك في رحيلك

لو كنت هتطلع فوق!!

(٧)

ليه الكمانجا بقلب إسود..

عمره ما بيصفي ل بيانو؟!

ليه هتفضل زي ما احنا

صورة وكتابة ورهان..

ليه الشتا كان وشه غامق..

والحنين واقف مكانو..

لسه تايه بين عنيا وبين عنبيكي في المكان؟!

ليه هسيبك.. ليه هقرب؟!

ليه بحب ساعات أجرب..

إني أمشي في سكه أصلاً

مش باينلي إيه آخرها..

وأما فجأة تضبيعي مني..

أعمل اني نسيت وأقول..

عادي بعني زي غيرها!

احضنيني قبل اما تمشي..

لو ضروري تودعيني..

واحفري صورتك في عيني..

وابكي على كتف اللي بيتنا

وادي ضهورك ليه  
في المطر ومترج  
يمكن انسى ان  
واقتنع إني هع

وادي ضهرك ليا وامشي..  
في المطر و مترجع عيش..  
يمكن انسى ان انتي مُتي  
واقتنع إني هعيش.

\*\*\*



## جواب مُرسل

جواب مُرسل

إلى «اليابانية» و«الون تو» و«باتستوتا»

إلى «بكار» و«عمو فؤاد» و«فطوطة»

إلى طفولتي ومريمتي

وتالت دكة صف يمين

وأخر فصل في الطرقة

اللي الفترة اللي انا فيها

مشوفتش وش للفرقة

إلى «ميكي» و«سمير» و«يوميات ونيس» وإحنا

إلى الباقي ف ملامحنا

من الوش اللي صورناه

ف صورة تاريخها تسعيني

إلى اصحابي اللي كانوا

زمان عليّ أعز من عيني

إلى «راجعين»

إلى «ونندم»

إلى «شنظة سفر»

بالذات..

إلى «جنجو» و«مستر كاجو»

إلى «شيكا»..

إلى القلم الرصاص اللي  
بيبقى ف آخره أستيككة  
إلى «دولسي» و«لبان بمبم» و«جيلي كولا»  
وأفلام القناة الأولى  
وفيلم السهرة ع الثانية  
إلى العجلة اللي كنت زمان  
بدل م اركيها بسحبيها  
إلى «سبيستون» وكواكيها  
إلى «باتمان»..  
و«كابتن ماجد» اللي عشان  
يجيب الجون تضيع حلقات  
إلى كل اللي عدى وفات  
أنا فاكرو وبالتفصيل  
ولطفولتي القديمة اشتقت  
ومين أصلا ف هذا الجيل  
هينسى الذكريات بالوقت  
هنكبر بس من جوا  
هنفضل برضه للي فات بنحن  
لأن الماضي بطبيعته  
ملوش دعوة بخانة السن

\*\*\*

## ف اسكندرية

ف إسكندرية الناس بُساط  
بيحولوا الحُزن انبساط  
يستقبلوك بدموع فرح  
ويودّعوك برضه بعياط  
الليل هناك زي الترام  
بيلفّ بالناس في البلد  
ف اسكندرية البنت بحر  
بتحوّل المركب ولد  
بتلفّ بيه مترسّيهوش  
الناس هناك مبيتنسوش  
الناس هناك تقدر تقول  
عنهم بيوت..  
بيسكّنوك.. وبيسكّنوك  
ويعرفوك إيه هو معنى الجدعة  
ومفيش هناك انتم وانا..  
الكل إحنا ف أي محنة يمد يد  
ف اسكندرية الناس بجد..  
مش ناس مُنافقة بأقنعة..  
اسكندرية ازاي وليه؟!  
ملقيتش إجابات مُقنعة

فبلاد جميلة بطبيعتها..

بتحس إنك منها

فبلاد كده تتحب

مش شرط بسبب

إسكندرية مش بلد من ضمنهم

إسكندرية بدون مُبالغة أهمهم!

\*\*\*

## إنسان سابق

أنا الليل اللي قرّر من القمر يهرب

أنا النجم اللي عاش يسهر

وأول ما ابتدى يظهر

لقى وقت النهار قرّب

أنا مية عفريت جوا العلبة..

أنا مية حدوتة ومية مجروح

أنا مية مليون واحد ماتوا..

أنا كبت وضيقه وخنقة روح

أنا فرح خنيق وطريق بيضيق

أنا مية مليون باب مش مفتوح

أنا صوت مكبوت وخناق وزعيق

وصريخ وتاريخ أصبح ممسوح

أنا كل طريق بمشيه فاضي

بتكعبل في بواقي الماضي

جريت أقيس للفرح قميص

ولقيته عليا مهوش لايق

اسمي في مشوراي مع الدنيا

في الآخر كان إنسان سابق

\*\*\*

## عيد ميلاد

خرج في المطرة من ذاته..  
بيتمشى ف شارع طال  
ويسأل نفسه ألف سؤال!  
فاضلك مين؟! فاضلك إيه؟!  
فاضلك حد تبكي عليه!!  
فاضلك بنت حبيتها وبتعانديك؟!  
فاضلك أب بيسانديك؟!  
فاضلك أم تدعيلك؟!  
فاضلك حد من جيلك؟!  
فاضلك حد بيجيلك  
زميل شركة.. وجار شقة؟!  
ف جيبك كام صديق صادق  
ف آخر الرحلة دي اتبقى؟  
أديك وحدك ومش شايف  
أساماً وحدتك ورطهية  
بتعمل عيد ميلاد نفسك  
وتطفي الشمع في التورتة!!

\*\*\*

## الوضع العام

الوضع العام..

بتنام وتقوم وتقوم وتنام..

وروتين ف روتين ف روتين ف روتين

مش عارف فين بيروح على فين؟!

أيامك يوم واحد داير..

حوالين أصحاب.. وحبيبة وبيت

-أنا أكثر واحد عاش يحلم-

وانا أكثر واحد قلت «يا ريت»

أنا أكثر واحد قال «عايز»

والدنيا قالتله براحتك عوز

الدور اللي حلمت تطوله

كان دور محجوز..

مفضلش ف فيلمك وف حلمك

غير دور أراجوز..

وعجبني الدور أول ما بدأت

لكن ملّيت بمرور الوقت

ولقيتني بدون أسباب اشتقت

لحاجات مبقيش منهم حاجة

من طبع الحاجة انها دائماً

كل ما بتزيد تنقص حاجة

ولأن الواقع  
زبي الأفلام..  
ولأن الأيام  
بهذا الأحلام..  
يتلخص كل  
إن انا دلوقتي  
وان قمت هك

ولأن الواقع مش دائماً

زي الأفلام..

ولأن الأيام مهووسة

بهدّ الأحلام..

يتلخّص كل الوضع العام

إن انا دلوقتي هنام وهقوم

وان قُمت هكرر يومي وانا!

\*\*\*



## كان بالإمكان

تعرفني إن انا لو مكبرتش..

أو متّ ايامها وانا صغير..

كان ممكن أفضل زي ما كنت..

ومكنتش أبداً هتغير

عارفة انا كان ممكن اكون عارف..

لو كنت سألتك عن إسمك..

كان ممكن اكون انا وانتي سوا..

لو كنت انا بطلت اتداري..

كان ممكن مشربش سجاير..

لو «مايكل» مدخلش تجارة..

كان ممكن لو مفتحتش «فيس»..

معرفش أساساً مين «سارة»!

كان ممكن بكره يكون أحسن..

لو كنت نسيت شكل امبارح..

كان ممكن جداً كان ممكن..

كان ممكن لو..

لكن مكتوب ع الشيء يخلص

وقت ما يحلو!!

طب عارفة كمان؟

كان ممكن اكون لولا اني قابلتك مش كاتب..

كان ممكن عادي ابقى محاسب..  
كان ممكن «مايكل» برضه يكون  
وتايا ف نفس البنك زميل..  
لو كان مستقطش ف سنة أولى..  
كان ممكن لو مبقيتش كبير..  
أكل في الشارع جياي كولا..  
كان ممكن مركبش العجلة..  
لو هو مكنش اتحداني..  
كان ممكن معملش الواجب..  
لكن ملقيتش بديل ثاني..  
ليه لما حاولت أغير شيء..  
في الواقع.. غيرني الأول..  
وكان الدنيا شرايط قطر..  
وسكك مش ممكن تتحول..  
وأديني خسرت ف جيم وكسبت..  
واهو شوفت كثير واتسابت وسبت..  
زقتني الوحدة ف 100 مترو..  
وسقتني الأوهام ف أزيز!  
كان ممكن أبقى وليه مبقيتش..  
السر علشان مكتوبلي أكون..  
زي ما ربنا أصلاً عايز

\*\*\*

## إن كان لك سر

إن كان لك حد بترتاحله..  
إحكيه ولكن سيبلك سر..  
متقالش لحد من صحابك..  
ولا أهلك ولا حتى حبيبة..  
كتر الفضفضة ده بيتناسب  
طردياً مع كتر الطيبة..  
متوديش نفسك ف مصيبة..  
خليلك سر وخلليهم  
كل اللي داريته كتاب يقروه..  
قول سر مسيرهم يوم ينسوه..  
علاقاتك مع غيرك دائماً..  
على سطر بتمشي وبتسيب سطر..  
سرك مفتاحك م الآخر..  
إنكره واخفيه وقطع ورقه..  
وإن كنت مصمم تحكيه..  
إحكيه لمسافر شفته ف قطر..  
هتفضفض وياه للأخر..  
و ف آخر السكة هتتفارقوا

\*\*\*

## 24 ساعة

إمشي وانسى منين مشيت  
-كل مرة اختار طريق-  
إحكي وانسى لمن حكيت  
-كل مرة اختار صديق-  
خالي دائماً كل شيء  
فيه جديد حتى السكوت  
لو بتلحق قطر 7  
سيبه بكره عليك يفوت  
لو بتركب خدها مشي  
لو بتمشي اركب مواصلة  
المهم إن انت تعمل  
حاجة كات عكس اللي حاصلة  
لو بتسمع غنوة حلوة  
ميا مرة وقوم ماسحها  
لو في حنة سهرت فيها  
كل لبلبة بلاش تروحها  
كل يوم بيعندي قرر  
إن بكره هيبقى غير  
فيه حاجات تكررهما لعنة  
زاد وجعها وزاد وجعنا

لم يعد للحاجة معنى  
بعد ما اتعملت كثير  
م الآخر وبكل بساطة  
مش قصة ورد وشوكولاته  
ولا قصة قهوة و«فيروز»  
فيه حاجات كده لو فكرنا  
هنحس إننا أفورنا  
في الشكل العام للحاجة  
بقي بالتدرج بيبوظ  
من كتر ما كات بزيادة  
حلاوتها اتقلبت سادة  
ده لأن بحكم العادة  
ولأن ده أصلاً جين  
مُتحكم فيا وفيكوا  
وف كل البني آدمين  
فيه حاجات لما بنعملها  
بتكون حلوة ف أولها  
وتضيع حلاوتها ف أول  
ما بتتحول ل روتين

\*\*\*

## نقطة الصفر

قلب البني آدم نقطة  
أهلك حوالبه عاملين دايرة  
وصحابك دول دايرة تليها  
وزمايلك في الجامعة ف دايرة  
وحبيبتك دايرة لوحديها  
فن المسافات بيلخبطهم  
فتخش دواير ف دواير  
تلاقيك مهما تفكر حاير  
مين أقرب ليك فهم دلوقت  
مين شاغل تفكيرك أكثر  
مين قرب مين نفسه ف فرصة  
الحب ده شيء بمرور الوقت  
نسبته جوانا بتتغير  
فتلاقي علاقتك مع غيرك  
شيء مش مضمون زي البورصة!

فتلاقي علاقة بتبدأ  
باتنين مثلاً في المترو  
انقلبوا بنظرة ف نظرة  
واتفارقوا بغلطة ف غلطة

كل العلاقات ف أساسها  
دايرة منعرفش مقاسها  
يا بتوسع بيهم جداً  
يا تضيق وبترجع نقطة  
كل العلاقات ف أساسها  
كات ناس مش دايمة لناسها  
ماهو أصل البني آدمين  
من سكان الفتارين  
تشتري وتبيع وبراحتك  
على حسب الذوق والعرض  
وعشان منلگش تاني  
ونعيد ونزيد ونعاني  
«الأرض بتمشي تفرق  
كل العايشين ع الأرض»

\*\*\*

الموت م الن  
إنك تتوقف  
عن أي وظا  
تتحول من  
شيء شبه ال  
منناش هتقو  
الموت من وج  
تلاقبك عايش  
محتاج تتكلم  
وجعك أكبر م  
الموت بوضوح  
مش طلعة روح  
ممكن متموتش  
ممكن يحصلك  
ده لأن الناس بنا  
من أول ما تعيش  
فتشارك ناس  
بتشارك ناس علك  
وبصرف النظر ان  
وجميع الأحداث  
«الموت مش نقطة

## مش طلعة روح

الموت م النظرة العلمية!  
إنك تتوقف بالكامل  
عن أي وظائف حيوية  
تتحول من حركي لساكن  
شيء شبه النوم جداً لكن  
منتاش هتقوم بعد ما هتنام  
الموت من وجهة نظري إنك  
تلاقبك عايش تايه منك  
محتاج تتكلم ولكنك  
وجعك أكبر من أي كلام  
الموت بوضوح  
مش طلعة روح  
ممکن متموتش  
ممکن يحصلك مية مرة  
ده لأن الناس بتموت فعلاً  
من أول ما تعيش مضطرة  
ف تفارقك ناس بالموت وانت  
بتفارق ناس علشان عايش  
وبصرف النظر المش متوجه غير ليهم  
وجميع الأحداث الحاصلة  
«الموت مش نقطة ف آخر السطر.. الموت فاصلة».



## الممنوع مرغوب

عُلماء الفيزيا اجتمعوا  
على إن الشيء لو شيهك  
هتقرب منه يسيبك  
علماء النفس اجتمعوا  
على إن فلان لو حبك  
عُمر عينيه ما تشوف عيبك  
قرب لو عُزت تفارق  
وابعد لو عُزت تدوم  
الشيء بيضيع من إيدك  
عشان فيه شيء جاي ليها  
الدنيا قواعد ثابتة  
وكلام مُثبت بعلوم  
طول م الحاجة قصاد عينك  
طول ما انت بتبقى ناسيها  
تبقى كثير الحاجة قصادك  
لكن عينك رايحة لغيرها  
تنسى الحاجة عشان ف إيدك  
أما اللي بتبعد ف فاكرها  
الممنوع مرغوب بطبيعته  
وانت عشان بتحب تجرب

كل ما حاجة بتبعد عنك  
تلقى ميولك منها تقرب  
فتضيق الأولى اللي فإيدك  
علشان مش لاقياك مهتم  
تخسر حاجة بحاجة عايزها  
مع إنها مكانتش أهم

\*\*\*

## البعد الرابع

البُعد الرابع للدنيا  
مُتحكم دائماً في الأحداث  
الوقت بيلوي ذراع الناس  
بيسيب بصماته على الأشياء  
مش خايف من سُلطة تراجعه  
الوقت إن شاف واحد مُشتاق  
عمره ما بيضطرب على وجعه  
الليل عندنا ف أوروبا نهار  
وشروقنا هناك بيقابله غروب  
وانا ظابط ساعتي بتوقيتهم  
وبلف ف دايرة يوم مقلوب  
الوقت بيكشف فينا عيوب  
وبياخد على قد ما ياخذ  
لا بيتعوض ولا ساب تعويض  
الوقت ملوش مقياس واحد  
ولا موقف ثابت بالتحديد  
الوقت بيجري اما بيحلى  
ويمهّدي اما تكون متضايق  
مين فينا معاشش ثواني سنين  
أو ضيع كام سنة ف دقائق!؟

وهي فضل وقتنا يسرقنا

وهي فضل نسرق فيه على طول

عائشين نتمنى انه يعدي

وعائشين نتمنى انه يطول

\*\*\*

## حد غريب

كل اللي يسيبك بيسبلك..  
تذكار علشان تفضل فاكر..  
تفاصيل أيامكم وتذاكر..  
إحساسك بالوحدة وتعرف..  
كام حد ف روحك سايب خدش؟!  
مين خد من وقتك؟!  
مين م أخذش؟!  
ودّعت ازاي؟!  
أو ليه ودّعت؟!  
أو حتى ازاي من نفسك ضيغت..  
ليه هدومك حتى ريحتها فراق..  
وكأنك حي من حزن طويل..  
انتهى بدموع على كتف حبيب..  
كل اللي يسيبك بيسبلك..  
كام غرزة ف روحك لما يسيب..  
كل اللي ف إيدك..  
كان ف إدين..  
غيرك بعدين لف وجالك..  
شوف مين مع مين دلوقتي ومين..  
من كل الناس دي اتبقالك؟!  
٤٤

كل الأحضان مهما تطوّل  
فمسيرك ترجع وحداني  
وتقابل حد من الأوّل  
وتقرب وتفارق ثاني  
كلنا جايين علشان نمشي..  
وده دور ليه حسبة وليه ترتيب..  
كل اللي يسيبك وقت ما جه..  
كان بالبنسبالك حد غريب

\*\*\*

## مشكلة الكل

إياك تتقرب من صورة..  
أو تعمل زووم على وش قديم..  
كان أصلاً موجود فوق وشك..  
أوقات لما تقرب تعرف..  
إن الطيب كان بيغشك..  
وان الشرير أطيّب بكثير..  
تفاجئ تتضايق تزعل..  
أو تعمل أعمى عشان خايف..  
لتبان قدام الناس شايف..  
حقايقهم لكن مبتنطقش..  
وإن قالك حد فلان قالي..  
تعمل إن انت مبتصدقش..  
وتكذب كل اللي سمعته..  
وتصدق دايماً بين نفسك..  
وما بينك إن الناس دول وش..  
لابسين ماسكات وبيتداروا..  
ورا كلمة بكره تهون معش..  
ومسير الوضع هيتغير..  
وهتفهم بكره انت صغير..  
إن الأيام أوقات تضطر..

الواحد إنه ساعات يعمل..  
ف حاجات ملهاش أصلاً تفسير..  
ويحب الضلمة وينسى النور..  
ويشوف العمى أرحم بكثير..  
ولكل قلوب الناس كوالين..  
مفاتيحها أساساً ف جيوبك..  
اقبلهم على عيهم تفتح..  
وصارحهم جداً بعيوبك..  
المشكلة مش فيك أو فيا..  
كلنا بمشاكل نفسية..

عايشين علشان نلاقيلها حلول..  
يمكن نرتاح من عقدة ذنب..  
أو نضعف حتى وناخد جنب..  
ونكمل حنب الحيط عادي..  
ونشوف شكلنا أحسن في الضل..  
مشكلتك إنك مش عارف  
إن المشكلة مشكلة الكل..  
كلنا خايفين أصلاً من بعض..  
وبنحزن واحنا ورا ضهورنا  
دايماً بنغبي لبعض سلاح..  
وعشان كده مهما تعيش وتشوف..  
متلاقي محدش مرتاح!



## أمنية موت

أنا ستي الله يرحمها..  
ربنا بالموت كرمها  
أقصد وبكل صراحة  
الموت بيكون فيه راحة  
ستي ف آخر أيامها  
جالها زهايمر خلاها  
تنسى التفاصيل بالكامل  
وفقدت القدرة تماماً  
على إني معاهما تعامل  
وبقيت ف حياتها مُشاهد  
متفرج زي الغرب  
لكن شايف عن قُرب  
قلقان تسألني أنا مين  
معرفةش بابه أجابها  
ولا تفكرني حرامي  
جاي يسرق منها ذهبها  
ستي ف آخر فتراتِها  
قبل اما تموت بسنة  
كانت فاكراي أبويا  
وكات فاكراة أخويا أنا

وشوية بقت مش فاكرة  
وبقيننا مجرد ذكرى  
من وسط كتير أوي راحوا  
ألعن إحساس هتحمسه  
تتمنى الموت لحبايبك  
علشان يقدرُوا يرتاحوا

\*\*\*

# دَمْعُ مَوْئِثِ سَالِمٍ

## إهداء

لكل اللي بقت بتخاف..  
عشان متفارقة من فترة  
لكل اللي ف عنيا بشوف  
دموع أكثر من المطرة  
وطول الليل بتستنى  
وحيارنة وشايلة هموم  
بتهرب للحياة بالضحك  
وتهرب م الزعل بالنوم  
ومخنوقة ومش طايقة  
تبص ف وش أحلامها  
وطول الوقت متضايقة  
يدوب بتقضي أيامها  
متهتميش.. يا نص الدنيا  
يا أمي.. وأختي وبنتي ومراتي  
طبيعي البنت ف حياتها  
تقابل في الطريق واطي  
تسيبله قلبها وروحها  
يسيبها بجرح من جوا  
ده مش عيب فيكي لا أبدأ  
ده سببه نقص فيه هوا

وهتقابلي اللي من ده كثير

ودورك لسه ليه تأثير

ده ربك لما لقي آدم..

وحيد في الكون خلق حوّا

\*\*\*

## برج الحيوان

دي الحكاية من البداية..

العلاقة بدوب صداقة..

عامل ايه ازيك انت؟!!

عاملة ايه انتي النهاردة

شات.. مكاملة..

معاد ووردة..

حلو فستانك عليكي

واللي أحلى لون عينيكي

كلمة جابت كلمة غيرها

والعلاقة اتغيرت

والصداقة اتطورت..

صاحبته اتقلبت حبيبته

وهيا شافت فيه حبيبها

عاشوا فترة جميلة جداً

بس بعدين قام سايبها

هي رنت هو كنسل..

واما جه يكلمها ثاني

كان اناني..

قالها: «اتسرعت أسف

كنت غلطان ف حساباتي»

واني كنت بحب واحدة  
من زمان وفارقتها  
واني حبيتك لأنك  
فيكي حاجة منها  
وانه واجب هيا ترجع  
جزء من يومي وحياتي

هيا تعمل إيه بـ«أسف»؟!  
ولا هي إزاي تعيش؟!  
الأسف أوقات بيبقى  
حاجه توجع ماتداويش

دي الحكاية وده آخرها  
هو عايش ويا غيرها  
أما هي:

وحدانية  
قلها مضلم وباهت  
زي ما تكون طفلة تاهت  
عايشة لكن ميتة

تشتاقله أواخر الليل بالذات  
وتقول معلىش اهو ماضي وفات  
لكن من غير أسباب أوقات  
أشواقها لأيامه يزيدوا

وتحنّ لصمته وتنهيدُهُ  
ولريحته وصوته ودفا إيدِه  
ولضمّة حُضنه ف كل شتا

ولأنه خلاص موضوع عابر  
ولأنه محبّس بقيمتها  
بعدت واختارت كرامتها  
ده لأن البنت بطبيعتها  
مبتساش لكن بتكابر!!

\*\*\*



## Zoom In

كل ليلة الليل بياخذك  
ناحية الصوّر القديمة  
جوًا ميموري لسه  
فاكر كل حاجة  
كات ما بينكوا  
تفتحي صورتك معاه  
تعملي ع الضحكه زووم  
بعدها بتقولي عادي  
وانك انتي احسن كثير  
وان قلبك ع اللي سابك من سكات  
بطل يغير  
واللي فات ده ملوش لزوم  
تفتحي قلبك لنفسك..  
تشتكي منك إليكي  
تقبلي الوضع لمجرد..  
إنه أصبح وضع حالي  
والفراق ياخذك لوجعك..  
تمسكي ف إيد الليالي  
يسالك قلبك ساعتها  
إزاي عليه جه يوم وهنت

ويا عيني ع اللي بينكسر  
جواكي م الوحدة  
ويا عيني ع الليل  
لما يكسر قلب بنت  
السكوت يسكن شفايفك  
والوجع يمسك إديكي  
والمراية تطفي صورتك  
والدموع بتخون عنيك  
فجأة إحساسك يتوه  
وسط ضعف ونهنية  
تقري ف مسد جاته  
كلمة «كل شيء بينا انتهى»  
دمعتك ترجع تخونك  
لحد ما عيونك وقلبك  
يلتقوا ف أحلام ونوم!  
تندمي إنك ساعتها  
جيتي ناحية صورة ليكوا  
أو عملتي عليها زووم!

## محتاجة أفضفض لك

عارف ساعات بحتاج افضفض لك  
وانت ساعات أكثر متسمعنيش  
فطبيعي جداً بعدها تسألني ما لك؟  
فيكي إيه فأقول «مفيش»..  
فيه حاجات كثيرة إن متقالتش ف وقتها  
لو تيجي تسأل بعدها  
مبتتحكيش..

أنا محتاجة أفضفض لك فمن فضلك  
يا ريت تهتم تسمعني  
عشان فيه ألف مية حاجة  
بسببك غاوية توجعني

\*\*\*

## حلاوة روح

مأساتها إنها مش لاقية..  
حد يحبها من جوا..  
أو يقبل كل ما فيها  
على وضعه وزى ما هوا  
كل اللي زمان حبوها..  
حبوا اللي شافوه من بره..  
ومجاش ولا حد ف مرة..  
بصّ لها بعين فهمتها..  
ومحدث حسّ قيمتها.  
ولا حاول يفهم ما لها!  
أوقات مأساة الواحده  
بتكون فعلاً ف جمالها  
كانت محتاجة لواحد  
ميشوفهاش شكلاً بس  
فيه حاجات مفروض تتحس  
مبنتليهاش من حد..  
ومفيش ولا بنت هتطلب  
إنها تتحب بجد!

## مش هسييك

هي بتقول سيبيني فعلاً..  
بس مش علشان تسييها  
أي واحدة بتبقى عايزة  
تشوف قيمتها ف عين حبييها  
هي بس ناقصها تعرف..  
هي فارقة ولا عادي  
حب عابر والسلام  
هي جايز لما تزعل..  
تبقى مش واعية لكلامها  
وانت فعلاً لو فاهمها  
مش هتاخذ ع الكلام  
يومها هتبص ف عينها  
هتبقى عارف فيها إيه  
مش هتحتاج حتى تسأل  
وقتها زعلانة ليه..  
وأما هتقول سيبيني تاني  
هتلاقيك ماسك ف إيدها  
محتوي خوفها وساندها  
وهتلاقها بتشتريك..  
وعايشة ليك ومعاك وبيك

هي قالت «سيبني» آه..

بس ده علشان يبان

هي إيه بالنسبة ليك

\*\*\*

## في حد ذاتها

البننت ف حد ذاتها..  
كُتلة إحساس غريبة  
بتعيش معظم حياتها  
أمّ وأخت وحبّية  
«أدم» بطبيعته سطحي  
بيشوف «حوّا» بعينيه..  
«حوّا» بطبيعتها عايزة  
«أدم» تسند عليه  
كثر التفكير ف غيرها..  
بيبوخ في الحكاية  
وانا شايف إن واحدة..  
عدل ونعمة وكفاية..  
البننت ف فيلم عمرك  
تنفع أجمل نهاية..  
بس انت اكتب سيناريو  
ميكونش في غيرها فيه!

راكنة روحك صفّ ثاني..  
في انتظار واحد مجاش..  
باختصار واحد يكون  
فاهم انتي عايزة إيه  
حد عايشة تقضي وقتك  
في انتظار مسكة إيديه..  
في انتظار لمعة عيونه  
لما يسأل خايقة ليه؟  
في انتظار فستان فرحكوا  
في انتظار حضنه وأمانه  
في انتظار واحد أساساً  
لسه معرفتيش مكانه  
حد كل وجوده لسه  
صورة مرسومة ف خيالك  
حد مش محتاج يقولك  
فيكي إيه أو بس ما لك؟!  
حد عارفك من زمان..  
حد عارفاه من سنين  
بس لسه متعرفيش  
إمتي حي وهو مين!



## دموع البنت

دموع البنت..

مبتعرفش تترتب

بتنزل منها عشواني

ولو دققت هتلاقي..

وجع مركون بقاله كثير

وجرح قديم..

وحبّ بجد..

دموع البنت لو نزلت

بتنزل واخدة دايمًا حد..

نزل من عينها وخسرها..

يا إما عشان عرف غيرها..

يا إما لأنه معرفهاش..

ومعرفش انها حبا..

لا منها لغيره دلوقتي..

ولا بتقدر تقول وياه..

وضحك البنت مش معناه

بان البنت ناسية الحزن

وناسية الخوف من الأيام

وعارفة تعيش وعارفة تنام

لأن البنت يا سادة..

هتفضل برضه كالعادة

سؤال وعلامة استفهام!؟

## من وقت لوقت

بتفكر فيه من وقت لوقت..  
وخصوصاً يعني في آخر اليوم  
وتعيش فأكراه في تنسى النوم  
وتحن إن جت سيرته في قعدة  
وان شمت برفان كان حاطه  
أو شافت خطاً شبه خطه  
أو واحد يشبهه شوية  
أو حتى ان سمعت أغنية  
كات نازلة جديد وبعتهالها  
وتخاف الناس تسأل ما لها؟!  
أو مين سباب مين؟!  
وإزاي أو ليه?!

وتقول ده نصيب بقى نعمل إيه  
والدنيا بتاخذ وبتدي..  
ومفيش ولا حاجة مسيرها تدوم  
وانا عادي يومين وهعيش وانسى  
وتداري برغم انها لسه..  
بتفكر فيه من وقت لوقت  
وخصوصاً يعني في آخر اليوم!!

## سكوت اضطراري

بتعيشي كأنك صوت واطي  
فِ شفایف مبتعرفش تبوح  
بتعيشي كأنك ناي زعلان  
وبيعزف لحنه بصوت مبوح  
مكياجك دايب ف دموعك  
والروج بإيدین صمتك ممسوح  
والجرح ف لحظة بيبقى جروح  
وخصوصاً لو قلبك يعشق  
ف تعيشي كأنك مش عايشة  
وتموتي كثير لو قلبك دق  
وتحبي وتضطري تداري  
علشان فيه شيء اسمه المفروض  
البنيت اللي بتعرف تنسى  
ملهاش في الواقع أي وجود  
الراجل أه بيعرف ينسى  
أما انتم لأ!

\*\*\*

بنكره نف  
عشان  
اللي بتقو  
عشان  
مواربة ل  
عشان  
وسابت  
على الفا  
دي كانت  
خلتها..  
مبتنامش  
كان زعلا  
بنكره نف  
كان نفس  
يفهم ض  
مش كل  
تنفذه بن  
أساساً  
ما دام  
نصوة

## عشان حبت

بتكره نفسها أوقات عشان حبت  
عشان ملقيتش حد يقدر الكلمة  
اللي بتقولها!

عشان سابت بيبان روحها  
مواربة لحد يدخلها

عشان ضعفت كثير جداً  
وسابت دمعها ينزل

على القاضي وع المليون  
دي كانت هبلة للدرجة اللي  
خلتها..

مبتنامشي ف وقت ما هو  
كان زعلان..

بتكره نفسها عشان..

كان نفسها تلقي اللي  
يفهم ضعفها ده ويحتويه  
مش كل حاجة تبقى أمر  
تنفذه بناءً عليه!

أساساً حبته على إيه؟!

ما دام هوا مقدرشي  
دموع عينها اللي نازلها

ولا كان حُبها فِ باله  
ده كان قبل اما يطلب  
منها تدعيه  
بتبقى هيا داعياله!  
وضاع كل اللي كان بينهم  
بأنانيته..

واهي دلوقتي عايشة  
تقول يا ريتني ما كنت  
حبّيته!

\*\*\*

## قاصر

سريري رصيف..  
ياخدني ف حضنه لما تطولني إيد البرد  
وعمري خريف  
مشوفتش فيه ولا خطيت جناين ورد  
وأوضتي الشارع المليان  
عيال تسرح تبيع مناديل  
بنقسم لقمة حاف لكن  
بنكفينا ف آخر الليل  
نبيع الفل للبهوات  
ونرضي بأي شيء مقسوم  
وبنكمل حياتنا بصبر  
وبنكمل عشانا النوم  
انا موعيتش ع الدنيا  
لقيتني ف بيت وليا حقوق  
ولو عثمانة في الحاجة  
بخاف احلم وابص ل فوق  
وعايشة حياتي روح رايحة  
ورا احلام بعيد عني  
مفيش ولا شيء مطلقني  
عشان مطحونة بظروفي

محااصراني العيادة بخوفي

وقلبي بهمة متعاصر

وليه أصلاً أشيل الهم

وأنا لسه يدوب قاصراً

\*\*\*

## كما تدين

أنا البنت اللي بتعزبها ف خيالك  
عشان ماشية لوحديها  
أنا البنت اللي بتحللها لمزاجك  
عشان عاجباك حاجات فيها  
كلاب سحرانة ف عيونك  
بتنهش لحمي بصّاتها  
وليه لنفسك مبسطها  
ولو عاتبك ف يوم واحد  
تقوله يا عم عديها  
أنا البنت اللي مش قادر  
تسيبها ف حالها في الشارع  
ف يوم لما بعنيك تتشاف  
أنا البنت اللي مش قادرة  
ف يوم تمشي لحد البيت  
بدون ما تخاف  
ف عنيك ليه مليش دية!  
بضيق لبسي بتلكك  
ولو قالوا حرام بلاقيك  
تجادل فيها وتشكك  
ومن جواك لغيت فكرة



بإِنَّكَ فِي الْأَسَاسِ إِنْسَانٌ  
عَمُومًا لَوْ رَاضِيهَا أَعْمَلُ  
وَعَادِي كَمَا تَدِينُ تَدَانُ!

\*\*\*

## لسه حلوة

لسه تحت عنيكي «إسود»..

م السهر ف ليالي فرقة..

لسه دمع عنيكي «إسود»..

والعياط نازل بحرقة..

لسه حلوة وأحلى ف «إسود»

لو يلون لك هدوم..

لسه كلمة يا نهار «إسود»

واصفة عندك كل يوم..

لسه شعرك لونه «إسود»..

كله غربة وكله ليل..

بس قلبك لسه أبيض

عمره ما اتعود يشيل

## كُل الطرق تؤدي إلى البنت

١- متوصلهاش للدرجة اللي تخليها تقول  
«ياريتني قتلت إحساسي»  
«وسبت مشاعري باب مقفول»

٢- البنت لو قالت «مفيش» يبقى  
في حاجات كثيرة مزعلاها بجد  
قمة وجعها لو تقول «ما لك»؟  
وتكون «مفيش» هي ساعتها الرد!

٣- طاوعها وحب تسمعها  
سواء زعلان في يوم منها..  
سواء هي اللي زعلانة  
عينها بتبكي في الحالتين  
فبالراحة على دموعها

٤- افهم إن البنت لو حبت بتبقى أضعف..  
قبلاش تهينها في ضعفها واتلم!  
وافهم كمان إن السكوت ده كسوف  
واهتم بيها وخلي عندك دم

٥- أبسط طريق للبننت هو الإهتمام  
مش بس «أهلاً» «عاملة إيه» أو «رايحة فين»؟!  
ولا كلمتين وقت اللقا وسلام سلام  
فيه فرق بين الحب وما بين الروتين!

٦- متقولش القصص الحلوة..

دايماً تخلص ع الفاضي

البننت «كتاب مفتوح»

ولا واحد فينا قراه

الراجل دايماً عايز..

بننت تنسيه الماضي

مع إنه بطبعه أساساً

بيحب يبصّ وراه

٧- ضحكها ان زعلت وراضيتها..

وان ضايقتك موقف عديها

وان خافت جداً هديها..

وخليك ع الفرحة معودها

دي الواحدة اللي تحبك نعمة

لو ضاعت مش هتعوضها!!

\*\*\*

المصري اليوم

## نور عينيك

نور عينيك قاعد في الضلمة  
بيولع شمعة ويدعيلك  
يباركلك ربنا في الكرسي  
يديك على قد ما تدينا يا حامينا  
ويخرب بيت «مرسي»  
هو اللي خربها وجيت انت  
بتصلح مصر وترفعها  
ومفيش أحمال زائدة ده عامل  
خد رشوة وهو اللي قطعها  
ليك شنة ورنه وليك هيبة  
لايق ع المنصب وكارينما  
حرية وعيش وقضاء شامخ  
أما البنزين فمفيش أزمة  
والدنيا جميلة وكله تمام  
ومفيش مسجون من غير تهمة  
واللي يعارضوك قلة اندست  
أو ناس بتشوشر مش فاهمة  
وإن كان ع الضلمه هنتعود  
وإن كان ع الجوع أهي مش فارقة  
وإن كان ع الصلاة ع النبي فإحنا

بنصلي بدون ما نشوف ورقة  
من إمتي اتعودنا نعارض  
أمرك على طول ماشي على الكل  
وإن كان ع الوضعب اهو يتحسن  
والناس مرتاحة وزبي الفل!

\*\*\*

## مصر إيه

مصر إيه؟!

مصر صوت العندليب

أو رواية من نجيب

مصر يعني سدّ عالي

والسادات بطل السلام

مسرحية فيها مشهد

كوميدي من عادل إمام

يعني «ثومة» فقهوة بلدي

يعني علم أحمد زويل

يعني آخر كل ليل

مصر يعني زحمة دائمة

فكل إشارات المرور

لما تلقى العيشة حلوة

رغم إن العيش طابور

لما تركب ميكروباصها

وتبقى متشعلق فباب

واما تركب فيها تاكسي

ومتلاقيش تدفع حساب

يعني ركعة في الحسين

بعد شهرين اکتئاب



يعني «أبو تريكة» اما فرح

قلبنا بجون في النهائي

مصر يعني أذكي عيل

طول ما هو في ابتدائي

مصر يعني الأهلي غالب

والزمالك عكس ذلك

قادم من بعيد..

يعني لو بطلت أشجع

يبقى انا ميت أكيد

يعني أي تشيرت تاخده

بنص تمنه ف بورسعيد

مصر يعني العيلة لما

تبقى فيلم اسمه «الحفيد»

مصر دولة كل واحد

مهما يحصل برضه هي

لسه حلوة ف كل عين

مصر فيها حاجة حلوة

هي ناسها الطيبين

## عبد المأمور

آخر مسمار في النعش اندق..  
والقالتة اهي تابتة وناوية تصيب..  
مع غيري ف صف هنتف لأ..  
لا إيدياً تسيب ولا إيده تسيب..  
الإسم حامها وهو جبان مبيشطرش إلا علينا..  
بدلة تحوله فجأة ل حيوان  
أول ما يطيح بيطيح فينا..  
ملعونة أوامرك ووزيرك..  
ملعون همجية تفكيرك..  
ملعونة عصابتك وزنادك..  
أنا ممكن اكون صاحبك أو اخوك..  
جارك أو واحد ف اولادك!  
وشي اللي ف وشك والدخان..  
حوالينا بيعميك قدامي..  
إشمعني هناك عبد المأمور..  
وقصادي لقيت دمك حامي..  
فبقيت تضربني بقسوة وغيل..  
علشان مش عايز اعيش في الضل..  
ملعونها الحيطة اللي بنمشي..  
جنبها عشان خايفين م الحيس..

ملعونه رصاصتك لو خرجت  
م الخزنه الميري وجات فيا..  
لو كات دي حمايتك ل بلادك..  
فأنا ههتف ضد الداخليه!

\*\*\*

## «الأوجرة ورا»

أنا التباع..

بضبع عمري ع الأسفلت

جرى عشان أجيب بكره

وفوتي وعلبة الدخان

وانطور وشي ف وشوش

كل نص جنيه..

يركب من مكان لمكان

أنا التباع..

يا باشا خلاص ورا ولا؟!!

دفعتي يا أبله كله تمام؟!!

تعالى اركب ورا يا شقيق

عشان فيه واد تخين قدام

يا عم احمد..

ناولني الشاي

راجعلك يعني هنروح فين

وهديك الحساب وانا جاي

معاك على جنب هات نفرين

وهدي ف داخله الكوبري

عشان على طول بيبقى كمين

بيسحبوا فيه الرخص دغري

وعليّ الصوت ومخمني

وسمّعتني صدى الطبلّة

ده صوت الست دوّخني

ثواني ونزل الأبلّة

أنا التباع مهيش عيبة..

صحيح كان نفسي اكون طيار

وكله في النهاية سواء

حديد وبيثلقط ب رادار

من الموقف على الشارع

على الإكشاك وع الدكاكين

بركّب ناس وأنزل ناس

ومش عارف محطتي فين!!

\*\*\*

## تيشيرت أحمر

دي كوره وجمعتنا زمان..  
فليلة عيد.. أجازة صيف  
ف ملعب إيجار..

فليل أو نهار

ف حارة.. ف مدرسة.. ف شارع!

من الآخر ف أي مكان يكون واسع

ويوم ورا يوم وجون ورا جون..

وانا بكبر.. بشجع نادي

لونه احمر بلون دمي

كما والدي وكما عمي

خدت حبه بالوراثة..

وكنت شاطر في الدراسة

أي ما في اللعب كنت

أبوه فاكر لما خدنا الدوري منهم

فرق بونت!

أبو فاكر جون «تريكة» في «الصفاقصي»

وجون «شهاب» في «الإتحاد»..

أبوه فاكر جون «عماد»..

والشيخ «أسامة» ف ماتش عمره

نهالي كاس الفين وسبعة

كنت جنبه ف كل حته وكنت مُخلص  
في المتابعة..

كنت في الإستاد بغني..

غنوة للنادي وكيانه

كنت عارف كل لاعب

وكنت عارف فين مكانه

فجأة زي العادة واقف

ضربة جاتي من ورا

صاحبي كان بيقولي حاسب

بس جات متأخرة..

والضربة سبقت صوت زميلي

ومت زي كثير ف جيالي..

وكنت كاتب فوق تيشرتي لما

مت ف بورسعيد

إني لو بطلت أشجع

يبقى انا مِيت أكيد!

\*\*\*

# على باب مطار القاهرة

الغربة دائماً..

عاملة زي التضحية بالأم علشان الجنين

هنعيشوا ولا هتسيبوها تعيش

يا شعب صلي الصبح

وقفه ف طابور العيش

يا شعب صلي الفرض

دم ودموع ع الأرض

وصفوف بطول وبعرض

بين ناس وشرطة وجيش

بنعض بعض ساعات

متقسمين جماعات

متقسمين أفراد

لكن قدرنا أراد

نقسم سوا خانة

جنسية مشتركة

في مصر حتى الزعل

والله فيه بركة



من وقت جيشها ما كان

ماسك ف إيد سينا

بيشدها م الزمن

رخص التراب يا بشر

بس التراب له تمن

«تمن التراب الدم»

أو موت ولاد العم

والغربة لو تضحية

فالأم لمتّه أهم

على باب مطار القاهرة

بتلاقي ناس ماسكين ف ناس بهبل

بتلاقي حد قبّل

ياخد سنينه كلها ف شنطة سفر ويروح

ما اهو زي غيري ما قال

«ملعون أبوك يا طموح»

والجوع ملوش توبة دايماً يموت كافر

يعجز لساني ساعات كثير

عن وصف أختي قبل ما تسافر

كانت بتكبر كل يوم أيام

كانت بتتكلم كثير من غير كلام

لكن عنها بترغي أزيد م اللزوم  
كان يومها خالي من الفرح والنوم  
كان يومنا خالي منها  
بعجز لساني ساعات كمان  
عن وصف أمي وهي بتودع «مها»  
أختي اللي سافرت ع الرياض شايلة ابنها  
كات حاطة روح أمي  
ف الشنطة وياها  
سافرت ولسه امي  
دايما بتدعيها  
والغربة زي الجرح  
توجع ف أولها..  
تحضرني ذكرى كمان  
محكي واكملها  
الدنيا ساعات بتسيب مشهد  
عمرك ما بتقدر يوم تنساه  
مشهد تشوفه يكبرك  
أضعاف ما عشت من الحياة  
أختي بتنزل بالشنط  
من بيتنا واحنا دموعنا  
نزلت جري ع السلم

سكت اللسان والحضن  
خد راحته واتكلم  
وكانني أول مرة بحضنها  
لا وكانني مش حضنها غير مرة  
نزلت دموعنا جوا مني ومَنبها  
فضحكنا من بره  
قولتلها «كويس.. على فكرة  
هتفضي البيت»  
فقالتي: «براحتك بس أحمد  
خد بالك منه ومن ماما»  
«مها» دايماً نكدية وعلى طول  
تقلبها مشاعر ودراما  
سببها تنزل وجريت ناحية  
أقرب شباك الملح عينها  
بصيت علشان أشبع منها  
مشبعتش مين فينا بيشبع  
من حد ف وقت ما بيسيبه  
ده الواقع وده دايماً عيبه  
إحنا ف أيام فيها وطننا  
ماشي يوقع ناس من جيبه  
شهدا على الجبهة

وشهدا هتاف

شهدا الأمراض والعيش الحاف

أبطال أفلام الجوع والبرد

أطفال في الشارع شايلين ورد

بيقربوا دائماً العشاق

يدوهم دعوة وياخدوا فلوس

كلنا عايشن نشحت من بعض

فممتعا بروش ولا تتباهوا

في بلدنا جميع الناس تاهوا

كلنا والله يا ناس فقرا

ومحدث فينا مهوش محتاج

كلنا لافين دايرة إنتاج

مش ناقصة الدايرة دي تنقص فرد

الأرض ان نسيت عوادها

عواد مش لازم ينسى الأرض

## المصري اليوم

المصري اليوم

بيقوم م النوم..

ينزل مش عارف رايح فين

أيام سودة وأسياد راضيين

أخبار.. أسعار.. أزياء موضه

كوميكات كوميكات كوميكات

لايكات.. لينكات في الشات

ومليت القايمه بنات

بالباقه المش محدوده

تسمع «أوكا» و«أورتيجا»

وتشوف «صافيناز» و«شاكيرا»

كان قلبك «واحد جيغا»

واتحول فجأة لـ «تيرا»

إيرادات أفلام «السبكي»

«هيفاء» و«حكيم» و«الليثي»

من أجل الإستقرار

انزل وانتخب «السيسي»

شعب مصمم يتغابي

أو يمكن ناسه غلابه

فاكرين الجيش دبابة  
وهنزل ناخذ صورة  
أو من أجل الإصلاح  
نزل يا «مورينيو» «صالح»  
اعتبره يا سيدي «رونالدو»  
والواد زي ابنك برضه  
ما الشعب خلاص باع أرضه  
واشترى بتمنها الكورة

و«مبارك» لما خربها..  
سايها من الباب الخلفي  
واهي مصر اتقسمت بعده  
فلّ وإخواني وسلفي  
على فين هنروح ف بلدنا  
السكة منين يا اسياDNA  
والشعب ده مبيتلمش  
غير لو يتصور Selfie  
كل اللي ف مصر بيغلي  
إلا احنا يا بتي آدمين  
أنا خايف بكره يقولوا  
إن أبو الهول كان قطري  
أو إن الهرم الأكبر  
أصلاً كان صنع الصين

مين قال ان بلدنا بلدنا  
لمجرد إنتا ساكنينها  
وفيه ناس غيري وغيركم أصلاً  
م الأول خالص ماسكينها  
دي بلدنا معداش كماينها  
غير ناسها الواصلة المسنودة  
ف بلدنا الناس وقت الكارثة  
بتشير صورة وبتغير  
صورة البروفایل الموجودة  
يا حداد على حد..  
يا لسبب ما..  
ويعدي يومين بعدها ننساه

أنا أسف طوالت كلامي..  
أنا أسف بتخطى حدودي  
لكن مأساتنا بتتلخص  
ف كلام كان قايله الأبنودي

«يا عم اقعد بس واشرب شاي  
الدنيا ماشية وشعبنا نساي!»

الحُزْنُ البَعِيدُ الهَادِي



## دكتور نيفين

تعرف تتكلم مع نفسك.. عن نفسك

وتقولك «ما لك»؟!!

تشكيلك منك سوء حالك

تقعد وياك.. تاخذك بالحضن

تطلع م الحزن.. وتنام راضي

تعرف تتكلم عن بكره

من غير ما تجيب سيرة الماضي؟!!

تعرف ترتاح؟! وتحبك أوي لو كان لازم

وتسيب الناس تمشي وتمشي

من غير ما تبص وراك تاني..

-على فكرة ساعات بيكون م الصبح-

إن انت تكون شخص أناني..

تعرف مشكلتك إيه وياك؟!!

إنك محتاج فترة راحة..

تتصالح مع نفسك فيها

وتواجه روحك بصراحة

وتشوف مين لازم يستنى

وتقوله «استنى» وتمسك فيه

وتشوف مين لازم يتودّع

من غير ما تفكر تبكي عليه  
وبعيد عن أي كلام اتقال..  
ربنا يهديك ويهدي الحال  
أنا عايز اقولك بس سؤال  
هو انت مخاصم نفسك ليه؟!!

أنا بعرف أعمل كذا حاجة..  
وقالولي زمان إن انا موهوب  
وبدقة كبيرة بشوط في الطوب..  
أنا عمري ما كنت ببات مغلوب  
غير ف بلاستيشن أو طاولة  
لكن في الدنيا بفضل الله  
مخسرتش أبداً ولا جولة  
مش عارف ليه دائماً ربك  
بيشوف ان انا دائماً أولى  
بالمكسب من أي منافس  
مع إني مقصّر في الصلوات  
وبناق واشتتم وبعاكس  
وقتلت توتر بسجاير  
وعملت ذنوب تبني عمائر..  
وغلطت كثير وكثير وكثير  
يمكن من حبه ف عبد فقير  
أو يمكن شايف فيا الخير  
مش عارف صدقني حقيقي

ولا قادر أفهم كل ده ليه..  
ودي حكمة ربك في حياتي  
ترتيب ربنا بقى هنقول إيه  
من رحمة ربك يهملنا..  
واحنا ببنتمادي ف عمايلنا  
وننام من غير تفكير سابق  
بضمير غلطان لكن راضي  
ونقول أهو بكره نتوب عادي  
ولا بكره ببيجي ولا احنا نهون  
على ربك حتى ونتجازي  
ولأنه كريم رحمن ورحيم  
أنا مش مستغرب من هذا!!

مش عارف ليه على عكس الناس  
بكبر بمعدل غير عادي  
وكبرت ازاي كام ألف سنة  
من وقت ما كنت ف إعدادي  
لو هقعده مع نفسي أحسبها  
الحسبة هتخلص ب جناني  
وهلاقي حاجات أنا بسببها  
بالفعل بقيت واحد تاني  
مستغرب ليه شكلك طيب؟!  
ندمان على حالك ولا في إيه؟!  
مش كان جواك إنسان طيب

إيه اللي اتغير فيك أو فيه؟!  
الدنيا تلاهي يا دكتورة  
بتخلي الناس بحالات على طول  
قدامك ليا فيه 100 صورة  
وانا فعلاً ولا واحد من دول  
أنا جيت الدنيا دي متبعتر  
متقسّم 100 مليون حته  
لا انا لاتي الراحة ففضفتي  
ولا لاتي الدوا جوا روشتة

أحيكك إيه عني قوليلي؟!  
ما تجربي إنتي وتحكيلي  
على فكرة صحيح..  
-كلنا مرضى-

أحلامنا بتخبط في العارضة  
فنحس بيأس وبنسلم..  
«من كتر اللي انا عايز أقوله  
مش عارف فعلاً أتكلم»  
مممكن أحكيك عن «سارة»..  
أو عن «رانيا»..

مممكن نتكلم عن أختي..  
الدنيا اللي فقلب الدنيا  
مممكن نتكلم عن «إسراء»..  
وساعتها كلامي هيبقى عياط

أنا ببكي عشان كان نفسي اضحك  
أنا بضحك من كتر الإحباط..  
هستيريا غريبة وبتعيشها  
مشاهدا بتنتهي بـ دراما..  
كلنا لحظة ما بنتفارق  
بتسدد من روحنا غرامة  
وبندفع عمر وحزن وخوف  
والخوف معروف لو زاد  
بضعف..

أنا مش تعبان بس ناقصني..  
أتعلم أصدق إني هخف..

أنا عايش وهم على الموضة  
والوهم حبس روحي ف أوضة  
ملهاش ولا باب..

أنا دكتور «أحمد» قالهالي  
وان شافني أكيد هيقول ثاني..  
إن انا من ناس غاوية تعاني  
وتقلب سكر أصلاً داب  
الحب عشان «حلو وكداب»  
بيعشم ناس وبيخلى بـ ناس  
وانا زي الناس عامل مرتاح  
جبت المفتاح ضيعت الباب  
ولقيت الباب ضاع المفتاح!

## حبيت كام بنت

حبيت كام بنت؟!  
أقصد حبيت حبيت يعني..  
مش حب يدوب كان بمكالمات  
أو حفلة سيما وكام صورة  
أو قاعدة ما بين اتنين ف كافيه

-حبيت حبيت كانت مرة  
وفارقت بجرح بيوجعني  
كل أما بفكر ف ماضينا  
أو حتى بدون ما بفكر فيه

حبيتها إزاي تقدر تحكي؟!  
أو تقدر يعني تقول تفاصيل  
كانت بتميز علاقتكم عن كل  
العلاقات الثانية؟!!

- حبيتها عشان كانت دنيا..  
من غير أسباب واضحة كفاية  
ضفايرها اتفردت جوايا..  
ولقيتني بدون أسباب برضه

بفعل حوالين حبتنا دايرة..  
ويشد خطوط تحت كلامها  
وكانت بقيت عايش علشان  
اعرف وأحقق أحلامها

وفراقكم؟!!

- وفراقنا ده قصة..

حدوتة ف قلب الحدوتة  
اللي انا بحكيك بدايتها  
تغيرها الجذري انا مفهمتموش  
حسيتها بقت واحدة غريبة  
لا اعرفها ف يوم ولا حبيتها  
مبقتش تحس ب ولا حاجة  
مهما اعمل مبقاش يعجبها  
في الوقت ده ادمنتها فعلاً..  
مقدرتش ولا لحظة اسيبها  
وفضلت اتعور من جوا..  
بكلامها اللي جرحني زيادة  
وفضلت انسالها اللي تقوله  
ولقيتها بعند بتتمادي  
وكانها خالفة اني اخسرها

باللعبه اللي ف ايدي اكسرها  
علشان مبقاش عبد لرغبة  
تتمكن مني وتأسرنني  
وانا مؤمن إن اللي يسبيني  
أنا مخسرتوش هو خسرنني

فلقيتني ف يوم بعلن إنني..  
بلعن أيامنا وتفاصيلها  
بعاملها بمثل ما بتعامل  
على قد ما باخد بدليلها  
على قد ما تهمل بهملها  
مبقيتش الساذج والسطحي  
والملوي دراعه عشان بيحب  
مبقيتش اللي ف يوم ما بيعشق  
بيشوف البنت ف كوشة وبيت  
م الآخر أيوه عشان تعرف  
حبيتها زمان ف بقيت أضعف  
والدنيا مشيت عكس ما اتمنيت  
«حبيت أحب بجد متحبتش  
حبيت محبش حد ف اتحبيت»



كان ممكن أوي والله  
 إن أنا مبقاش وبقيت  
 إن أنا مبيكيش وبيكيت  
 أنا للدرجادي عبيط؟!!

.لا كمل بس أنا سامع

عارف أنا كل ما بكسب  
 بحسب فلاقها خسارة!  
 عارف كان ممكن جداً  
 أفضل لسنين مع «سارة»!  
 نتجوز ونجيب بنت  
 صدقني زمان أنا كنت  
 بطمن للأيام..  
 واحلم بالبيت الواسع  
 والحلم كبر جوايا  
 أنا كنت بشوف أوقات  
 «سارة» دي بتصلي ورايا  
 معلىش ان كنت بأفور  
 وبعيش أحلام وردية

صدقتي العيب مش فيا  
العيب في الدنيا وعيها  
بتحب الحاجة تسيبك  
وتحبك حاجة تسيها  
وانا زي ما شفت روتيني  
بطلت اكتب من فترة  
عارف أنا معظم يومي  
زيارات أصلاً لدكاترة

أنا مبسوط ان انا شوفتك  
أنا مبسوط اني حكيتك

- بس انت بجد واحشني  
كان ضغط الشغل حايشني  
ويدوب أول ما رجعت  
من بره رجعت وجيتك  
بلكونتك فين انا عايز  
أطلع أشرب لي سيجارة

استنى الأول بس

بنتي اللي ف ثانوي

يا سيدي

سلمي على عمو يا «سارة»

\*\*\*

## أسف يا عم «فالنتاين»

أسف يا عم «فالنتاين»..  
عذري السنادي كمان وسجلني  
غياب..

السنجلة مش مشكلة..  
مش طالبة عك..

ولا ناقصة شك وغيره حتى  
أو عتاب..

منكرش إن انا نفسي حقيقي  
أخرج مع بنت واغير جو..  
ويقولك لو..

أنا كنت لقيت حد بيضهم  
أنا كنت ساعتها بقيت جنبه  
لكن أنا كل ما اكون مع حد  
يبعد ويقول قال مش ذنبه  
وأنا قلبي ده مش فندق يعني  
أنا أبسط حاجة بتوجعني  
وأهو عادي مجتش على اليوم ده  
وأنا أصلاً عايش من مدة  
ومسستم نفسي على الوحدة  
وحياتها عايشها يا عم تمام

لا انا بشحن زي الناس على طول  
ولا برغي كثير في التليفون  
ولا بقعد أسب لـ«فودافون»  
ولا ضايح وقتي ف أي كلام  
ولا قاعد مجروح م الصدمة بسمع  
«مش زي الأفلام»

أنا زي الفل وإشطه وبيس  
مش بفتح شات بالليل ع الفيس  
ولا بسهر أكتب أغنية  
«لا بأس ببعض الحنية»  
وبعشم نفسي أعيش مع حد  
والاقيه بيسيبي بدون أسباب

\*\*\*

## غير متاح

تبيعون من نمره انا معرفهاش..  
لو كنت حافظها زمان جدا..  
ونسيتها عشان نسيت هي  
وسابني لوحدي بدون أسباب  
وقالتي بارت تبعد لكن  
نفضل من بعد البعد صحاب  
نظمن من فترة لفترة..  
تقابل؟! جايز مين عارف  
الدنيا أكيد هتجمعنا..  
به الآخر قلنا كلام يمكن  
على قد ما رتحننا وجعنا  
وقفلت ساعتها ودست ديليت  
على كل صورنا ورسايلنا..  
ورقمها كمان برضه مسحته  
ومسحت كلامنا ف آخر شات..  
كنا بنتكلم بعديها.. لكن  
مبقاش بينا مكالمات  
أنا قلت ارتبطت وارتاحت  
زوجودي خلاص مبقاش فارق  
وفضلت اعرف غيرها وافارق

وعرفت ومعرفتش غيرها..  
ونسيتهم وفضلت فاكرها  
أحياناً كنت اسأل نفسي  
طب هو انا باجي ف تفكيرها؟!!

طب هو مريحها وهي  
برضه بتدعيه اما تصلي  
من هنا لهنالك رديت.. سألت  
«إزيك»؟! «إيه الأخبار قولّي»  
«طمني عليك بعد بعادي»  
رديت: «الحمد لله عادي»  
«إزيك إنتي وإيه الأخبار؟»  
ردت «من غيرك تعبانة..

وبحس بوحدة وذنوب فظيع  
كان لازم افكر قبل ما ابيع  
أصل النبي آدم بسذاجة  
عمره ما بي فكر في الحاجة  
غير لما تضيع..

وأنا لما حسبتها ف غيابك  
ملقتش سعادتي الا ف حبك  
والفرحة اللي انت اديتها لي»

أنا كنت مقشعر م الفرحة  
لكن كان كل اللي ف بالي  
الجرح اللي انا بعدها شفته

والخوف اللي ف بُعدها خُفْتُهُ  
ف قاطعت كلامها بكذبة وقلت  
«معلش انا دلوقتي لغيرك..  
ومعاهها ومش هبعد عنها»  
معرفة انا ليه كدبت عليها  
جايز علشان شايل منها  
أو جايز علشان علاقتنا  
بقي فيها كسور مبيتصلحش  
ومساوي ياما متتعدش..  
ف قفلت معاهها وانا مقرر  
مهما اتصلت تاني مرْدش

\*\*\*

## نزيف داخلي

الوقت؟!!

الساعة واقفة بقالها كام أسبوع ونص

دلوقت؟!!

مبقتش حاسس إن انا هعرف أحس

ببيكي وبضحك بالقوي..

برقص وانا ف حالة نزيف

-الشتا من غير حبيبه إمتداد فصل الخريف!-

أنا بدبل يومياً واكبر

في اليوم أيام وساعات أسابيع

أنا كل ما هي تضيع مني

بضياعها بضيع..

أنا كل ما بتخيل طيفها..

بتخونني دموعي بدون تفسير

على كتف صحاب.. على كتف اغراب..

بحضن ف سراب.. وبحب واغير

أنا عامل حيا زنزانه..

وداخليها بدون أي جريمة..

أنا كاتب حبك فيلم كئيب

بيبيكي العشاق في السيما



انا طفل معجز بغير  
على قلبك مني عشان أمشي  
مش شايف غيرك قدامي  
ولا شايف للأيام قيمة..

مجروح بيضطرب على مجارح  
نشابة فريح رايحة وجاية..  
لا انا قادر اشوفك ضحيتي  
ولا قادر اشوفك أنانية..  
أنا عندي ذمول وف فضول أعرف  
أنا وانت ازاى فجأة بعدنا؟!  
كان حب حقيقي ده ولا احنا  
على بعض حبيبتى اتعودنا؟!

السما بتمطر- وانا وانتى عن بعض بُعاد  
لا أعرفك عنوان ولا سكة ولا بينا معاد..  
أنا تايه منك جواكي.. أنا تايه مني وملقتنيش  
من كتر ما كنت بموت فيكي.. معرفتش اعيش  
معرفتش احبك حب بسيط.. يربطنا بخيط  
رايح من إيدك على إيدي  
معرفتش احبك حب روتيني وتقليدي  
معرفتش احبك غير بدارما وخوف وشكوك..  
بومياً بتخيل فرحك..  
وانا واقف وسط المدعووين وبقول مبروك

قلقان بيظمن قلقانة..  
هيعيش ازاي الحب ان خاف؟!  
المحزن جداً في القصة..  
إن انا أيوه بحبك لسه  
وانك مكتوبه عليّ بجاف  
لا انا عارف اشيلك من قلبي  
ولا عارف أفضل جواكي..  
أنا فعلاً مش عارف أسيبك  
ولا عارف أفضل وياكي..  
لا لقينا سعادة ف قصتنا  
ولا حتى ساعدتيني أساعدك  
مع ذلك هتكتب علي قلبي  
«ممنوع علي أي بنات بعدك»

\*\*\*

## عشر دقائق بُكا

للمرة العاشرة بقول «ما لك»  
وتقولي «مفيش حاجة.. اتطمئن»  
وتحاولي تخبي كلام باين  
من غير ما تقولي كلام يداريه  
جه عياطك بيقاطع صوتي  
وأنا بسأل سر سكوتك إيه؟!  
أنا ربي ف وادي وأنا ف وادي  
موجوعة بشكل مهوش عادي  
من سبب أنا معرفهوش لسه  
وما زلت مُصرَ إنك تقوليه  
فسألتك «طب بتعيطي ليه»؟  
وأنا عايش ليه أو علشان مين  
أو لازمتي إيه أصلاً عندك؟  
هو أنا مِش قُلْتُ ف أول يوم  
حبيتك فيه هفضل سانداك؟  
وان سُفْتُ دموعك همسحها  
من قبل ما عينك تبكيها  
إن كان فيه حاجة أنا معرفهاش  
لوحني هتجرحني احكيها-

ردت بعياط أكثر ف بكيت  
وبكينا لحد أما شهقنا  
و ف وسط كلامنا رميتلي سؤال  
«تفتكر الموت هي فرقنا»  
لكن من قبل أما تجاوب  
أنا طول مانا عايشة هكونلك قلب  
بيحبك ولاخر نبضة  
لحظتها لساني سكت مني  
واتحول إحساسي لقبضة  
وحاولت أكذب إحساسي  
علشان ميبانش ان انا موجوع  
فبدأت أغير في الموضوع  
قاطعتني وطلبت مني اهتم  
وقالتلي انها عملت تحاليل  
وطلع عندها سرطان في الدم  
وحياتها يدوب حبة أيام  
تتعد على الإيد مش أكثر  
وقتها حسيت اني اتشليت  
م الصدمة ومعرفتش افكر  
وبدأت عياط ومخلصتش  
غير لما قالتلي كلام حسيت  
منه انها بتقولي وصية  
فسمعتة وروحي بتتقطع  
وأيديها بتبرد ف أيديا

إن انا منساش اللي ما بينا  
واني أحصلها على الجنة  
هي هتسبقني وتستننى  
ودي كانت آخر أمنية

\*\*\*

# جواب ماوصلش

حبيبتي الطيبة جداً/

تحية طيبة زيك

مفيش المرة دي ازيك

مفيش بعد الغرام والشوق

من الآخر أنا مخنوق

بقولك إيه..

بقالي كثير محسسش انك الأم اللي بتلومني

على

تقصيري ف صلاتي..

ولا حسيت

بانك أختي ومراتي

وديني ودنيتي وبنتي

بقالنا كثير مخدناش بعض م الدنيا

وروحنا مكان مفيش فيه غيرنا أنا وانتي

بقالنا كثير

كأن انا وانتي متفارقين

بنتكلم كثير لكن.. كلامنا قلته أريح

وكل ما نيحي نتكلم.. أنا وانتي بنتجرح

وبنعاتب ف بعض بهم.. وبنحول حياتنا لغم

يا ساكنة ف كل نقطة دم..

أنا والله مش نكدي  
ومش قماص  
ومش زعلان يا ستي خلاص

أنا كل اللي أنا عايزه  
نعيش أنا وانتي متفقين  
ونأخذ هدنة م الخناقات  
وم القلق اللي عايشين فيه  
ولما أقول ف يوم همشي  
تقولي استنى رايح فين  
وأنا بعدك هعيش ازاي  
حبيبي وليه

تقولي «هسيب»

أقول «لأه»

أقول «همشي» تقولي «بلاش»

تكوني ف جرحي بكرة شاش

وأكون لو تتعي راحتك

حبيب بيظمنك دائماً

وأخوكي اللي انتي بتحبيه

أنا معرفش من يوم لما حبيتك

لغاية وقتنا هذا بحبك ليه

يا مجنونة.. يا أعبط عاقلة

في الدنيا..

وأطيب بنت شريرة

يا رب تموتي م الغيرة  
يا رب تموتي فيا كمان  
يا رب كمان أموت فيكي  
على الله نعيش سوا ف أمان

خلاص مش عايز أقول حاجة

ومش مستني منك رد

باقيلي بس إني أقول

بإني بحبك انتي بجد

ولا عايز ف يوم غيرك

ولا فكرت أتمنى

معاكي طول مانا ع الأرض

لحد ما نطلع الجنة

فصلي ورايا لو صليت

ولو قصرت عاتبيني

وحبيني وعيشي عشاني

أرجوكي

جواب مرسل من المدعو:

حبيبك

إبنك المجنون

وجدو

وبابا

وأخوكي



# ورقة ومقص

فيلمك خِلس..

نثر النهاية بيبقتدي..

حدوتة بين ورقة ومقص..

ماساة طويلة بتنتهي..

بموسيقى أهدى من الشروق..

إزاي هنهرب من هنا؟!!

أو فين هدوق طعم الهدوء؟!!

وإزاي بجيلك قلب يوم تتغيري..

أو تقدري..

لو ساعة واحدة على الغياب..

وتقطعي مع الجواب..

وتغوري وش اللي كان بينا

ونسبي جرح ف كف إيد..

بكره اللي كان ماسك إيديكي ف سكتي؟!!

ضل البكا لسه موانس خطوتي..

من بعد ما فارقتي الطريق..

مبقيتش أنفعلك حبيب..

ولا حتى قابل دور صديق..

مقدرش أقسم نفسي علشان أنفعلك..

جواب مرسل من المنظر  
حبيب  
إبنك المفضل  
وغيره

مقدرش أعيشك نص نص...  
وعلى العموم أنا كنت عايزك بالأخص  
لكن أنا مقدرش أكون ورقة عشان حبك مقص

\*\*\*

## عياط شتوي

الزمن: أول ديسمبر..  
جو شتوي بطعم يوجع..  
كنا واحد ساب حبيبة  
السما أوقات بتصفى  
بس في الغالب كئيبة  
والحياة كات فيلم عربي  
بس مخلصش بجواز..  
وانتهي بنهاية كانت  
كلها حزن ودراما..  
لما شافها راكبة مترو  
بس كان بينهم إزاز  
واما شاف في أيديها طفلة  
صغيرة بتقول «يا ماما»  
واما شاف غيره في أيديها  
واما جت عينه في عينيها  
هي خبت عينيها منه  
كأنه عمرها ما كان في بالها  
بعدها ضحكت لجوزها  
وبنتها وراحت لحالها  
لما شافها اتمنى تبقى

هي دي المرة الأخيرة  
وابتسم بس ابتسامته  
كان وراها دموع كثيره

بعد سنة واتنين وخمسة..  
كان ف نفس مكان جمعهم  
يوم وداعهم فافتكرها..  
لما كان مستني يركب  
مترو من نفس المحطة  
لما عدت بنت حاطة  
نفس برفانها اللي كانت  
هي حطاه يوم وداعها  
بس كان ف إيديه مراته  
وابنه نايم فوق دراعها  
الشتا دايم بيوجع  
مهما فات الوقت بينا  
ضحكنا فيه عبارة عن  
دمع متداري ف عنينا  
والمخلص في النهاية  
جملتين قالوا الحكاية

الأماكن والروايع والأغاني والشتا  
كل دي أشياء تعيش أي ذكري ميّنة

## مشهد غبي

إدبني مساحه ووقت أقول..  
حيبتك؟! أكثر م المعقول  
صدقتك؟! عمري ما كدبتك  
أنا عمري ما سبتك تسبيني  
ولا قلت هسيبك ولا سبتك  
إنتي اللي ف لحظة اتبخرتي..  
وكانك حلم انا منه صحيت..  
لو كان لك عقل وفكرتي..  
كان ممكن تستني معايا  
كان ممكن نوصل لبداية  
ولهدنة تاخدنا من الأحزان  
لو ليا رجعتي انا هفرح أه  
لو مرجعتيش أنا مش زعلان  
م الآخر يعني أصل انا إنسان  
وبحس ويندم وأتعلم  
وبعاني عشان أعرف أنسى  
وبعيش ب الزق  
طب لسه بحبك؟! أه لكن  
لو جيتي سألتني هقولك لا

بشتاق؟! منكرش كثير بشتاق  
وبحنّ لّين موبايلى ىرن..  
وبحنّ لصوتك مهما يغيب  
وبحنّ لإيدك مهما تسيب  
أنا كنت معاكى غريب عنك  
و ف بعدك عني انا عني غريب  
مبقيتش بحس ان انا حاسس  
من كتر اللي انا حاسه ف غيبتك  
ده لدرجة إني منيش عارف..  
سبتييني انتي ولا انا سبتك؟!  
ولا ده كان حل وصلناله  
علشان نرتاح من أفكارنا؟!  
بالذمة مبوحشكيش يعني  
ولا عينك بتشوف ف صورنا؟!  
ولا عقلك قالك فين هو؟!  
ولا قلبك سالك بعمل إيه؟!  
وبعيش ازاي وهعيش مع مين؟!  
معقولة يكون قلبك لا اشتاق..  
ولا مرّ بأي حنان وحنين؟!  
أنا كنت عبيط للدرجادي؟!  
ولا ده كان إخلص للماضي  
ولا ده كان وهم وصدّقناه؟!  
أو يمكن بس انا صدقته  
أنا عارف إن ده مش وقته

أنا بس بقول اللي أنا شايله  
ويفضفض مع نفسي شوية  
أنا عارف لأ.. أنا متأكد  
من إنك روحتي ومش جاية  
وفيه باب ورا باب ورا باب بينا  
ومفیش ولا باب منهم مفتوح  
أنا كل اللي أنا مستغربه  
إزاي بعد ده كله ارتاحتي  
وإزاي أنا بعدك كده مجروح

أنا هنكر إنك جوايا..  
أنا هنكر إنك ف وريدي  
خدي صورتك من نن عينيا..  
خدي ريحة إيدك من إيدي  
خدي نفسك بشويش من قلبي  
من غير ما تقولي أنك ماشية  
مش عايز أعيش ف وداع تاني  
واتحايل علشان تستني  
خدي نفسك وامشي بعيد عني  
خدي كل الماضي اللي ما بينا  
خبييه ف مكان أبعد مني..  
وخديني ليوم أنا ماعرفتك  
وبلاش نتقابل ولا اشوفك  
ولا أعرف إنك موجودة

إنهي الحدوتة من الأول  
لا انا حمل الحب ولا عمايله

ده كلام متشال.. اتقال من حد  
كان فعلا أه بيحب بجد  
وبيسهر يبعث ف رسايل  
لو حتى موصلتش رسايله  
لكن دلوقتي ويا خسارة  
اتشدت ع القصة ستارة  
واهو قاعد من حزنه ف أوضته  
بيكلم صورة على موبايله

\*\*\*



يا رحمة نزلت ه السما..

على كل إيد عشماني

ف إيدين ربنا

يا كل شيء مش زينا

يا وردة يا متزينة

طعمك أمان

بُعدك شجن

زنزانه فيها الكل بإرادته اتسجن

من غير سبب

عملوكي أوضة مضلمة

وارتاحوا فيكي من التعب

ربك بيدنا الحياة

أوقات على هيئة بشر

وانتي حياة متوزعة

على كل ناس متجمعة

ف أحزان..

واتقاسموا ف الفضفضة

والوحدة والنسيان

يا صاحبتني يا صاحبة الفستان

لسه النهار له عنين

## صاحبة القستان

يا رحمة نزلت م السما..  
على كل إيد عشمارة  
فإيدين ربنا  
يا كل شيء مش زينا  
يا وردة يا متزينة  
طعمك أمان  
بُعدك شجن  
زنزارة فيها الكل بإرادته اتسجن  
من غير سبب  
عملوكي أوضة مضلمة  
وارتاحوا فيكي من التعب  
ربك بيدنا الحياة  
أوقات على هيئة بشر  
وانتي حياة متوزعة  
على كل ناس متجمعة  
فأحزان..  
واتقاسموا ف الفضفضة  
والوحدة والنسيان  
يا صاحبتني يا صاحبة القستان  
لسه النهار له عنين

وانا بيكي شايف مية نهار

ف متزعليش..

مقدرش أقولك غير مفيش

أنا زي منك نفسي أطيّر

لكن مفيش ف جناحي ريش

الدنيا دنيا وكلنا دراويش

الهم هم وكلنا مجارح

مراكبنا ماشية عكس سير الريح

عاشين بنستني اللي مش جاين

أموات وعاملين نفسنا عاشين

يمكن نعيش فعلاً.. يمكن نصدق

نفسنا..

بتمنى نهرب من هنا..

ونروح سوا لأيام زمان

أيام ما كان الحب حب الروح

أيام ما كنتي عيلة بفستان

## يمكن ربنا بيعلمنا

إننا تايه وانتي كمان تايهه  
وظروفنا دي بتكتف إيدنا  
ربنا كان ليه قدرة عجيبة  
إنه يجمعنا ويبعدنا  
فيسببني اشتاق بعد ما سبتك  
وأسيبك برضه ف تشتاقي  
يمكن ربنا بيعلمنا..

إننا بنزول وانه الباقي  
يمكن بيقوم أخلاقك..  
يمكن بيقوم أخلاقي

أو شايل حاجة ف علم الغيب  
أو شايل مني عشان قصرت  
من يوم ما بعدتي وانا إتغيرت  
مبقتش أضحك زي العادة  
ربنا بيغير لو شاف واحد..

متعلق بحبيبته زيادة  
فياخدهم من بعض لنفسه  
علشان يهديها ويهديه

وان رجعوا لربنا يتلاقوا  
حكمة ربنا بقى هنقول إيه

## طفل جداً

أنا طفل جداً..

وده شيء باينلك مش ضروري اني اثبته..

أنا دبة بتموت صاحبها ان حبته..

أنا طفل لما بحب شيء..

بفضل أخاف إني اخسره..

وان ساب إيديا وراح بعيد..

أول ما يبعد بكسره

أنا طفل عمري معاكي عمري ما اكبره

فاستحلمي ان خلقي ضاق

وطلبت منك يوم فراق

دا انا قبل ما بسيبك بحن

وبعد ما بسيبك بموت

مقبلش أبدأ يوم يفوت

وتنامي فيه متنكدة!!

أنا طفل جداً فافهمي

إن العيال دائماً كده

## صباحك

صباحك ضحكة بتسگر..  
ساعاتي الجاية من يومي  
صباحك عين بتختارلي..  
بذوقها الحلو ف هدومي  
ندوم الضحكة دي ويدوم  
وجودك كل أول يوم  
لأن الشمس مش بتقوم  
حببتي قبل ما تقومي!

إزاي حببتي بتقدري..  
تبقى المسافة وبعدها  
تبقى الحياة وما بعدها  
تبقى الشوارع كلها..  
تبقى المساكن والأماكن والغنا  
إزاي حببتي بتقدري تبقى أنا!

\*\*\*

## سبيب الحب يختارك

وكانت هي بتحبه..  
وكان بيحب غيرها بجد  
وكانت غيرها دي بتحب..  
ف غيره وغيره مع غيرها  
ومهما فضلنا نتمنى..  
محدثش باقي فينا لحد  
ودي القاعدة من الأول  
ودي العبرة اللي ف آخرها..  
محدثش عاز ف يوم حاجة  
وجت ف إيديه على الطبطاب  
تحبك هي تنساها..  
تحب انت فتلقاها  
تقول خلينا عادي صحاب  
ولو صادفت وحببتها  
وكات حباك كمان هي  
تملوا شوية بشوية..  
وتلقى الحب يتحول  
لأي علاقة روتينية  
رجعتي إمتي من بره؟!  
وقلت انا ألف مية مرة  
خناقة من الهوا تبدأ..

يا صوتك يعلى على صوتها  
يا نكره خوفها وسكوتها  
يا نكره عندها وتزهق  
تبص تلاقى علاقتكوا  
بنتحول خناق ف خناق  
ومن أجل الجميع دائماً..  
بتنهبوا المشكلة بفراق

يا أطيب أغبي ناس في الكون  
كرهنا الحب بسببكوا  
مفيلش في الدنيا شيء مضمون  
فسيبوا لربنا نصيبكوا  
بلاش تستهلكوا الإحساس  
فناس ملهومش فيكم حق  
نصيبكم حي مهما يغيب  
وبكره قلوبكوا تشبع دق  
عزيزي اللي انت بتدور  
على الحب اللي نفسك فيه  
بلاش تجري وراه لأنه  
هيبي لوحد.. خايف ليه؟!  
ومتفكرش طب إمتي؟!  
ومتزودش أفكارك  
بلاش تختار ف يوم إنت  
وسبب الحب يختارك



## سبيب وأنا أسيب

ليه بنلعب دائماً  
سبيب وأنا أسيب..  
وتغيبني واغيب  
ماهو يا انتي غريبة  
يا أنا اللي غريب..  
يا احنا الاتنين مجانين بغباء  
نبعد نشتاق..  
ونقرب جداً نكره بعض..  
نلجأ للبعد..  
نبعد نشتاق  
ونقرب جداً من تاني  
وتعاني وأعيش جنبك اعاني  
تفضل تتكرر حكايتنا  
ونعيد ونزيد..  
لا انا عارف أقرب ولا عمرك  
بتكوني بعيد  
أول ما بنرجع بحلفك  
إن انا مش سايب لو سبتي  
واني هكون جنبك يا حبيبتي  
وهكون مخلصك لو غبتي..

وان كُنْتِي لغيري انا هبقي وحيد

أول ما بنرجع تقوليلي..

إنك غلطانة ف حساباتك

وانا جزء مؤكد ف حياتك

وحبيبيك وأبوكي وذاتك

والحُضن اللي بيملاه التنهيد

وشوية شوية بنتغير

وبننسى كلامنا ونتفارق

ونقول معلىش قدر ونصيب!

وبنرجع نلعب

سيب وانا اسيب..

\*\*\*

## مكان ثابت

أنا عايز واحدة اما احضنها..  
يتحول كل كلامي دموع  
واتحول عيل بيعاند..  
ساند على إيدها عشان يمشي..

أنا عايز واحدة مبتنامشي..  
غير لما تحس ان انا مرتاح  
غير لما تشوف نفسها فيا  
وتكون حدوتة وأغنية..  
بسمعها فأروح في النوم على طول

أنا عايز واحدة تكون فاهمة..  
أنا ساكت ليه من غير ما انا اقول  
تفهمني وتستوعب إني..  
خايف وإن خُفت تَطْمَني  
وان خافت تتداري ف حضني  
وتاخدني من الحزن ان خدني  
واخطفها من الدنيا بحالها..  
وتسيبني وتعمل ما بدالها  
و ف قلبي مفيش واحدة بدالها

ويشوفها الناس منها يغيروا  
ومشيلش ف يوم منها ان سابت  
واشتاق لو مرة ف يوم غابت  
وتكون ف حياتي مكان ثابت  
مهما ابعد عنه مليش غيره

\*\*\*

## عن بنت

عن بنت بتسحب بالليل..  
وتسكن روجي وتفاصيلها  
عن بنت انا مهما مشيت فيها  
بلاقيني يدوب على اولها  
انا برجع دايماً بحكيلها..  
واشاركها همومها ومشاكلها  
وبحب كلامي عشان ليها  
انا برجع عيل مع اول..  
حدوتة حبيبتني بتحكيها  
بتعلم منها اكون انسان  
قلبه ابيض ف ابيض مش بيشيل  
بتعلم منها اشوف بكره..  
ولانه معاها وبس جميل  
ملامحها بتبهرت على شكلي  
فالاقيني شبيهها وبلاقيها  
تشبيني ف ضحكة انا بضحكها  
وف دمعة مصمم اختيها  
انا بحلم بيها بيحلى الحلم  
وبحس اننا طالعين من فيلم  
او شخصيات كارتون «ديزني»

معرفةش ازاي دخلت قلبي  
من غير حتى ما تاخذ إذني  
الدنيا اهي رسمت أدوارنا  
مش ناقص غير صالة وسيما  
أنا كل ما حطها ف مقارنة  
مع حد بيبقى ملوش قيمة!

\*\*\*

## قبل وبعد

### قبل

مبدنياً.. هي حالة  
بنت مبعوتة ف رسالة  
نازلة من سابع سما  
جنة على هيئة ملامح  
وش مخلوق من براءة  
لما بس تغيب ثواني  
الحياة بتنقص إضاءة  
هي إسمي وهيا سني  
ومهنتي ف قلب البطاقة  
ربنا اللي اختارها ليا  
باختصار عيشها فيا  
هي مهما أنا قلت هيا  
صعب أوصف هيا إيه  
نعمة لازم أحترمها..  
واحتويها..  
وأبقي واثق إن فيها  
كل شيء أنا نفسي فيه..  
ربنا طيب بخاطري

واستجاب لآتي فدعاها  
إلى الأبي بليت تبقي  
دنيي وارتاح معاها  
من ديلة فدكف إيدي  
عيلة نايبة فدوريدي  
بين قديمي وبين جديدي  
ميا عمر أنا بيتديه!!  
ميا كويري وليل ومطرة  
من طاقة حب نادرة  
رغم خوئي لسه قادرة  
نعنويني وتحتويه  
ميا أقرب حد مني  
زي ما تكون شيء ساكني  
والرجولة فكوني إني  
طفل بتطبطب عليه  
من لحظة بالف عام  
عشوائية في الكلام  
حلم دايماً لما انام  
بلتقيني حلمت بيه



بعد

هيا كانت كل حاجة  
كل حد وكل يوم  
يرمي روحه ف بحر روحها  
واما يغرق فيه يعوم  
هيا دبله بين صوابه  
فاهمة عقله وعارفة طبعه  
هي كات من يوم ما شافها  
نص تاني مكمله  
واما كان بيكون اناني  
او غريب تتحمله  
حلمهم كان بيت صغير  
حضنها عفشه وحيطانه  
هو بيموت فيها جداً  
هي كات بتعيش عشانه  
هي غابت واما غابت  
كل شيء ف بعادها غاب  
هي مسكت فيه مسكها  
والقدر هو اللي ساب

أنا وهو وهي

(١)

البُكا كان لا إرادي  
والزعل كان بانتظام  
السكوت كان وضع عادي  
والكلام كان مش كلام  
هيّ حالة.. واضحة جداً  
باختصار حالة وفاة..  
والغريب إن اللي مات  
لسه على قيد الحياة  
نبضه عادي.. شكله عادي  
عادي جداً.. عادي بحت  
روحه طلعت فوق معاهم  
بس جسمه لسه تحت!

طب ليه بنتعلق بزيادة؟!  
وسؤالي ده ليك انت وهي  
مع إن البُعد قانون ثابت  
ودي حاجة أساساً طبيعية  
هنا من ومحدث ضامن  
ونعامل ومحدث كامل  
ده لأن التعريف الشامل  
للدُنيا انها رايحة وجاية!

(٣)

أنا نفسي أقول اني بحبك..  
مع ذلك..

خايف أقولها لك

مع إن صوابي بتتكلم

مع كف إديكي وانا بسلم

وعنيا اللي كتير بتبلم

وانتي ف غيبوبة ولا ف بالك

مع إنني بقولك لما بقول

إن مفيش غيرك فرحني

وان احنا كلامنا مريحني

و ف تعابير وش بيفضحني

و ف قلقي اللي ف كلمة «ما لك»؟!!

وانا نفسي أقول اني بحبك..

مع ذلك..

خايف أقولها لك

بصيت للحي شوية..  
 وحاولت أتخيل شكله  
 بجواز وضغوط ومشغل  
 والشغل وتقل مشاكله  
 أو شكلي أن شعري ابيض  
 وشي وتجاعيده ان زادت  
 ولقيت ان انا مش ممكن  
 أتحول قصة اتعادت  
 وأطلع ع الدنيا معاش  
 أو آخر مشهد ليا..  
 ينتهي والناس حواليا  
 فسرير أوضة الإنعاش  
 أنا مش متخيل فعلاً  
 إن ده ممكن يحصلي  
 وان انا ممكن أوصله  
 إحساسي الدائم قالي  
 إني هموت قبل ده كله

هيجيلك وقت تحس انك  
 أبرد من أبرد تلاجة..  
 وتنام وتقوم.. وتعيش عادي..  
 مش حابب ولا كاره حاجة..  
 ولا فارق وياك ولا حاجة..  
 ولا نفسك تبقى ف يوم حاجة..  
 ولا أصلاً ندمان على حاجة..  
 يستغرب غيرك من حالك  
 فتلاقي سؤال بيقول مالك؟!  
 فتجاوب «عادي مفيش حاجة»!

(٦)

وضمّيني كأنك برد..  
كأنك خوف.. كأنك حزن..  
كأني خلاص هموت بكره..  
كأن الحضن آخر حضن..  
كأن عنيكي مش جاية  
خلاص ف عينيا من تاني..  
ونامي جوا شرياني..  
وحسي بالأمان جوا..  
وكوني حناني وحنيني  
وبوسي رقبتني وسيبيني  
كأني مفارقك الليلة  
ل مكان معرفش فين هوّا



(٧)

ريحة روحك سبرتو..

ريحة كتفك دموع

ريحة قلبك أغاني

ريحة حضنك رجوع

ريحة روحك سبرتو..

وشربت الليل سكرت

ريحة كتفك دموع

فارقك صاحبك كبرت

ريحة قلبك أغاني

طالع نازل تعاني

ريحة حضنك رجوع

من أول يوم سافرت!!

معظم حكايات كل العشاق..  
تتلخص دائماً كالاتي..  
اتنين يتقابلوا ف تتطور..  
علاقتهم ل علاقة غريبة..  
مش شرط حبيب جنب حبيبة..  
الفكره ان الاتنين يبقوا..  
شايفين شيء حلو بيجمعهم..  
وقلوبهم تعمل زووم فجأة..  
فمساحة الرؤية تقوم تكبر  
فتبان تفاصيل أكثر وأكثر..  
تختلف الصورة اللي اترسمت  
وتبان حقيقتها الأصلية..  
وعشان قربوا فجأة زيادة..  
ترجع علاقتهم سطحية

للغنوة ملامح واضحة  
 بتبان كل ما بتركز..  
 فيه أغاني انت بتسمعها  
 تلاقيك بعدها بتعجز  
 مع إن الغنوة دقائق  
 بتجر سنين وياها  
 طب فاكر «عمرو» زمان  
 ليه أغاني انا مش بنساها  
 أنا لسه بحب «ونندم»  
 وبحب «تملي معاك»  
 الصوت واللحن ف ذاتهم  
 مش بيكونوا أغنية  
 فيه أغاني كثير ف حياتنا  
 كانت فترات زمنية  
 أول ما انت بتسمعها  
 تلاقيك جوا فلاش باك!!

الدنيا غريبة بشكل غريب..  
 ماشية بترتيب ملهوش ترتيب  
 بتقرب ناس من ناس بالوقت  
 وبتبعد ناس عن ناس وتغيب  
 حاصل ضرب الأيام في الناس  
 على قسمة ربك يبقى نصيب  
 تعريف الخوف إنك تبقى  
 خايف تتساب أصلاً ف تسيب  
 يا هتندم على شيء لو سبته  
 يا هتفرح بعد ما هتسيبه  
 ربك قسّمها بحيث إنك..  
 تتوقع شيء يحصل غيره  
 وتسيبها ف تمشي بترتيبه  
 كلها حسابات وبتتقيد  
 ف دفاتر بكره وعلم الغيب

(١١)

مش عايز أختار..

اقتار لي يا رب

مين هكره بُّكره

ومين راح احب!

أنا عندي يقين لا متناهي

إن من الأحسن 100 مرة

إن الترتيب يبقى إلهي!

ودعت اصحابك كام مرة؟!  
 مين جنبك مين سافر برة؟!  
 مين لسه مشاركك أسرارك  
 مين دايمًا عارف أخبارك  
 مين مد إيديه ف جيب أيامك  
 مين خد من عمرك وقت كتير!  
 مين كان دخان في الشدة يطير  
 مين فيهم لسه ومين مبقاش  
 مين شاري ومين بايعك ب بلاش  
 مين فاضل ليه أي معزة  
 مين وقت ما مت مجاش عزى  
 مين عيط؟ مين فيهم مبكاش؟

الطب اتقدم مع ذلك..  
 جرحك موجود زي ما هو  
 ده لأن مفيش دكتور في الكون  
 يا عبيط هيعالجك من جوا  
 عثمان ف حاجات مش بقيالك  
 عايش تتحسر على حالك..  
 كل الأيام اللي ف بالك..  
 أيام من ماضي مهوش راجع  
 ف طبيعي يكون جرحك مهما  
 بتعالج فيه بيفضل واجع..  
 إنسان صلاحيتك مُنتهية  
 ندمان على ناس راحوا ف داهية  
 كان أولى تكون دلوقتي سعيد  
 مبسوط علشان ربنا نجاك  
 وان حاسس إنك لسه وحيد  
 اطمئن ربك لسه معاك

لو شاكك أوي في المتبقي..  
 وخلص هتفلتر وتنقي..  
 وتصفي الناس اللي حابهم  
 م الناس اللي خلاص هتسيهم  
 خد ناس مش منظر ع الفاضي  
 دقق من جوا تشوف بوضوح  
 ده لأن الشخص اللي بيجرح  
 أوقات بيعيش دور المجروح  
 ف افتح لك قوس م الوحدة يساع  
 اللي هيتنسي واللي هيتباع  
 واللي هتمضيله قرار بوداع  
 وياريت القوس يفضل مفتوح



(١٥)

من يومي وايدي

دي عايشة تسيب

ناس بالترتيب

ف فهمت ان الدنيا مراحل

وان انا زي ما راحلين راحل

ما انا حي الدنيا غريب عنها

وهسيبها غريب

الحب إن زاد عن حده يذل  
 ويخلي الطرف الثاني يمل  
 الحب يببداً حلو أوي..  
 ويببداً طعمه الحلو يقل  
 فيه ناس من ضعفك قدامها  
 بتحس انها فعلاً مالكاك..  
 وبيعرفوا قيمتك متأخر  
 لما ميبقوش فارقين وياك  
 شوف غلطك فين علشان متجيش  
 بعدين تتلخبط وتعيده..  
 ده لأن مفيش إنسان دايماً  
 بيقدّر قيمة اللي ف إيده  
 كلنا كان فيه ناس ف حياتنا  
 ومن غير أسباب بدأوا يغيبوا  
 لو غيرك مش عارف قيمتك  
 بكره هيعرفها اما تسليه

(١٧)

يا تكون فارق.. يا تفارق

رغم انك في الحاليتين

عمرك ما تكون مرتاح

ودع واتوجع فترة..

احسن ما تعيش

بتخبط على باب

ملهوش مفتاح

عمرك حسيت إنك مفروض..  
 على كل العالم من حواليك  
 مش مرغوب فيك..  
 ووجودك يشبه لغيابك  
 ووحيد مع أهلك وصحابك  
 وحبيبتك لو سألت «ما لك»  
 مبقيتش بتعرف عامل إيه  
 مبقتش بتفرق في فراقك  
 ولا عارف حتى مفارق ليه  
 ملعونة الوحدة صحيح لكن  
 أوقات بتريح وتهدي..  
 ده لأن مفيش موقف مهما  
 كان صعب عليك مش هيعدي  
 خد فترة راحة وخذ وقتك..  
 وإديك فرصة تكون إنت  
 أنا ماشي وفعلاً مش عارف  
 أنا هرجع ليه وهرجع إمتي

عارف لما تحس برغبة  
مُلحّة ف إنك تبكي..  
لكن مثلاً تبقى ف شارع  
أو حواليك الناس تتلم  
تفضل حابس دمعك جوه  
مستكثر حتى انك تشكي  
عمر ما حد يحس بهمّك..  
غير لو شايل زيك هم..  
تقعد جنبه ويقعد جنبك  
بقلب همّك همّه لضحك  
تضحك يضحك هو معاك  
بعلى الضحك وترسم بسمة  
زي القهوة بوش «Black»!

أنا عايز أهرب م الشارع  
م الناس والدوشة وأي زحام  
أنا عايز أهرب م التفاصيل  
م الليل والضلمه و م الأحلام  
من كل الحُزن المتداري  
من كل الوجد التكراري  
من كل الصمت الإجباري  
والخوف الخام..  
أنا عايز انام يمكن أنسى  
أنا عايز أنسى ويمكن انام!

وجمع قلبك وتنهيدك..  
 وصوتك وانتي قلقانة..  
 وشكلك وانتي زعلانة  
 وشعرك لما بتلميه..  
 وحُضني لما بيلمك  
 تخافي ازاي وانا موجود  
 ومين غيري يشيل همك؟!  
 دانا بيتك وانا أهلك..  
 يا ماشية ف دمي على مهلك  
 بلاش تبقي سبب حيرتي..  
 وتكشيرتي وسرحاني وتفكيرتي  
 مفيش غيرك هينفعني..  
 ولا راح ينفعك غيري!  
 بلاش يبقى الكلام بشروط  
 كفاية سكوت وخوف م الجي  
 دا انا لو طال سكوتك اموت  
 وبسمع صوتك ارجع حي!

فاكرة أول مرة سُفتك؟!  
كنت مبهور م اللي شايفه  
قلبي بيعضّ ف شفايفه  
م التوتر أو لأنك..  
سبتي فيا حاجة منك  
كُنّتي بتبصيلي بصة  
فيها شوق وهدوء وصمت  
كنت خايف أو ملخبط  
أو هعيط ف ابتسمت!



ولأنني بقيت مصدوم في الناس  
مكتبهم ع الهامش برصاص  
مع أول غلطة لأي فلان  
ممسحه من بؤكره بأستيكة  
مش قلة ثقة في الناس لكن  
من كتر ما قلبي من الناس شاف  
أنا لسه حقيقي بجد بخاف  
أقرب من حد واجرب  
واكتب ف حياتي الناس بالجاف

(٢٤)

أنا عادي كويس دلوقتي  
أو هبقى كويس لما هنام  
محتاج أرتاح فاوصف لي علاج  
محتاج محتاجش أكون محتاج  
أنا أسف جداً ع الإزعاج..  
أنا كنت زمان واضح لكن  
اغمقت روعي مع الأيام

(٢٥)

جرعة الحب الزيادة  
مش ضروري تجيب سعادة  
مش طبيعي ان انت تعشق  
حد أزيد م اللزوم  
إدي على حسب احتياجك  
حبّ لكن وبمزاجك  
واقسموا الحب اللي بينكم  
نص نص عشان يدوم

(٢٦)

أنا فيا كسور مبتتجمعش..  
مع ذلك عيني مبتدمعش  
ووصلت لدرجة تخليني  
كل اللي بينزل من عيني  
ناس كانت حاجة كبيرة زمان  
لكن دلوقتي خلاص مبقتش  
وعشان كده من فترة طويلة  
أنا عايش بضحك اهو ومبكيتهش!

تعرفني ترجعي زي ما كُنْتِي؟!  
 تعرفني ترجعي بيتي وبنتي  
 وحبيبتي اللي ف يوم ما بتزعل  
 بزعل م الدنيا وبتغير!  
 أو أمي وأختي اللي انا مهما  
 بكبر شايفين إني صُغير  
 محتاجلك جداً وبقرب..  
 ومشاعرك مني بتتهرب  
 مش عارف فعلاً إيه المطلوب؟!  
 دانا بنزف من جوا وبره  
 وقايلك أكثر من مرة  
 إنك لو غبتي بعيش مرعوب!  
 وبحس ان انا مبقيتش بحس  
 أنا بطمن بوجودك بس..  
 وفبعدك مبقيتش اطمئن  
 لو جنبي فيه ناس غيرك دائماً  
 فانا مش محتاج غيرك إنتي  
 تعرفني ترجعي زي ما كُنْتِي؟!

أنا كنت بفضفض لو شاييل..  
 دلوقتي بقيت بالفعل كتوم  
 كتر التفكير خسرني كثير  
 والجرح كبير بس بداري..  
 أنا عايش محبوس من فترة  
 في سيناريو ومشهد تكراري  
 «إزيك؟! عامل إيه؟ قولي..  
 بتصلي؟» «بقيت أيوه بصلي»  
 «نفسياً؟!» «عادي أنا كله تمام»  
 أنا نفسي بجد ألاقي كلام..  
 ميكونش اتقال وجديد لسه  
 أنا نفسي بجد ف وقت ما انام  
 ميكونش عشان عايز أنسى

أنا كُنت بخاف وما زلت  
وطلعت كثير ونزلت  
وفارقت كثير وفضلت  
بيكي على اللي انا ودّعته  
مأساتي الأولى فإني  
ملقيتش اللي يطمّني  
والوقت الضايع مني  
ضيعني عشان ضيعته

دكتور..

أو ممكن صاحب

مرتاح له شوية حكيت

وبكيت فضفضت زيادة

فضفضت أكثر ف بكيت

«عندي مشاكل في البيت

وبنام أكثر ما بقوم..

وبقوم وانا عايز انام

يمكن بهرب بالنوم

علشان مش لاقى كلام

يمكن وطبيعي ووارد..

أصبحت سخيف أو بارد

مش بفهم في الإتيكيت

بطلت شوية أجامل

وبقيت بالمثل بعامل

مبقيتش ف عينهم كامل

علشان مبقيتش عبيط!!



أنا مُفتقد..

إحساسي إني اضحك أوي

من غير عياط

إحساسي إني احضن أوي

من غير شروط..

إحساسي إني افرح أوي بالارتباط..

إحساسي إني أحبها واتحب موت

بقالي كثير مجرتبش أحب بجد

أو أوحش حد..

بقالي كثير مبتعلقش..

عشان مقلقش..

عشان الحب مش دائماً

بيقدر يغلب الأيام..

بنام علشان أعدي اليوم..

ومش بالسهل بعرف انام

وطول الوقت بتوتر..

واخاف أكبر..

واصلح غلطتي بغلطة

بتبقى ساعات كثير أكبر

بعلم مشاكلي بمشاكل

ويهرب م الضغوط بضغوط..

وطول الوقت مش زعلان

وطول الوقت مش مبسوط

مِنَّا لِلّٰهِ

## ضاقت

ضاقت فلما استحكمت..

ضاقت أوي..

ضاقت بشكل مخالي

روحي مكشّرة..

بنزل لتحت.. برجع ورا

واكسب خسارة وبعتره

مقبوض وميت م القلق

تفاصيل حياتي مكشّرة

ضاقت فلما استحكمت..

عصرت عينيا دموع وخوف

مطحون ما بين حلم وظروف

عايش بموت.. أعمى وبشوف

والفرحة لحظة قصيرة

ضاقت مليش غيرك سند..

ومكنش ليك كفواً أحد

رحمن بكل اللي اشتكى

جيت بالبكا..

وكلامي كله نهنية

رجع لي كل اللي انتهى

الدنيا قفلت نفسها

مفتاحها فين طب يا ترى؟!

\*\*\*\*

صلي على النبي أوقات الضيق

و الله مسيرها هتعدل

مين قال ربنا خد منك شيء

ربنا يا بيدّي يا بيبدل

## سبحان الله وبحمده

سبحان الله..

أقصد يعني..

كان كل ما قلبي بيوجعني

بلجأ للسبحة اللي فإيدي

وبقول الله الله الله..

أوقات انا كنت بروح في النوم

أوقات انا كنت بروح وبتاد..

السبحة جناح

سبح ترتاح..

سبحان الله أصلاً مفتاح

أو كلمة سر لباب مخلوق

في السما علشان لو جيت مخنوق

تطلع على فوق..

تنسى المعاناة..

سبحان الله.. سبحانه بجد

نحتاجله نبطل نحتاج حد

والحمد لله

أقصد برضه..

كلنا عايشين هنا على أرضه

بإرادته ومن كرمه وخيره..

كلنا ملناش فعلا غيره..

رزقنا كلنا مبعوت من فوق..

ارتاحوا يا خلق ده كله نصيب

مكتوب مين فينا هيبقى لمين

مكتوب مين باقي ومين هيسيب

الرضا بيخلي الحزن يهون..

ربنا لو عايز شيء هيكون

الفكرة انك ترضى وتهدى

كل المطلوب م العبد الصبر

اتفرج على حكمة ربك..

ومسيرها هتظهر بالأيام

فيه حاجات نفسنا فعلاً فيها..

لو حصلت يمكن تطلع شر..

وحاجات على عكسها كارهينها

بتجيب وياها الخير قدام!

## رسالة من تحت

برايا شروخ.. جوايا شروخ

فيلم الأيام عمال بيبوخ

الوحدة تابوت.. وانا لسه بموت

بعمل مبسوط.. وانا بتالم

والحلم كابوس.. وانا فيه محبوس

والدنيا دروس وانا بتعلم

إديني جناح.. علمني ارتاح

علمني أفضفض وابقى صريح

الصبر مرار.. والناس صبار

كل اما احضنهم ببقى جريح

وبلملم قلبي وبرجعلك..

وانا كلي كسور ووجع وفراق

يا رب العالم.. يا عالم

كل الأشياء

«اشتقت إليك فعلمي

أفضل بشتاق»

اشتقت إليك ف كلمني



انا ساكت وانت اللي معايا  
اشتقت إليك ف علمني

من بكرة مبصش ف مرابة  
ما حاولت اتصبر ب بكايا

وبكيت مرتا حتش ولا مرة  
انا كل ما بكتم جوايا

بكبر وبعجز من بره

رخت لدكتور نفسي عديته

فبقينا احنا الاتنين مرضى

لا انا لاقى طريقة عشان أهدي

ولا لاقى الصبر عشان أرضى

مش قادر أشوف ولا

باب مفتوح

جوايا جروح.. برايا جروح

مبقتش ببوح غير وانا مدبوح

وبفتح عيني يشوفني الخوف

وبغمض عيني بشوف بوضوح!

بدخل أبواب وبسيب واتساب

ومفیش ولا باب للحزن اتسد

الوحدة قرار.. وانا خفت اختار

قضيتها هزار.. واهي قلبت جد

يا رب انا دائماً مُشكّلتِي

في الخوف م الحي

يا رب..

«إن كنت أعرّ عليك ف خذ بيدي»!!

\*\*\*

فاكر لما زعلت عشان..  
حاجة عايزها وضاعت منك  
كنت بتبكي يومها اكمئك  
قلبك كان متعلق بيها  
ونفسك فيها..  
عدى الوقت عليك ونسيتها  
زي حاجات عُرْتها قبلها  
إوعاك تحزن..  
عمر ما ربنا ياخذ حاجة  
إلا عشان يديك الأحسن!

\*\*\*

## مننا لله

حُضِن البُكَاءُ لله يساع ف ابكوا  
كل اللي بكيوا ل ربنا ضحكوا

كل اللي بيطلع فوق  
من حيث الوزن يخف  
كل اللي بيفضل فوق  
من حيث الحزن يخف  
السما تنورة كبيرة  
والناس دراويش بتلف

"الله الله.. دراويش دراويش  
أنا سايب إيدهم متسيبنيش  
أنا كل ما احبك كل ما اعيش  
والناس للود والدين لله  
والروح بتروح جوا الملكوت  
من غير ما ياخذها ملاك الموت  
ولحد الحد المسموح بيه

تطلع وتلف بإذن الله

أنا مش محتاج منك غيرك

أنا مش محتاج من غيرك شيء

رسييني ان كان مكتوبلي ارسى

أنا لسه بدور على فرصة..

أنا لسه في ألف طريق وطريق

\*\*\*

يا رب كل المطحونين

شوق أو شقا..

فيه حاجات كثير متعلقة

اكفييني شر النفس لما تعوز

واكفييني شر الضحك لو كان تريقة

اكفييني شر الحب لو هيقبل

واكفييني شر القرب لو هيندل

واكفييني شر حبيبتي لو هتمل

واكفيها شري ف وقت ما أبقى كتوم

اكفييني شر الفضفضة ومعلش

أو عشمي في الناس اللي غاوية تغش

واكفييني شر الكركبة في الوش

واكفييني شر الإكتئاب والنوم

يا رب خد بإيديا نفسي أقوم

اكفييني شر الإندماج في الحزن..

والإحتياج للحضن

واكفييني شر الوقت لما يضيع

والخلق لما تبيع..

والدمع في التوديع

يا رب كل المطحونين

شوق أو شقا..

فيه حاجات كثير متعلقة

اكفيني شر النفس لما تعوز

واكفيني شر الضحك لو كان تريقة

اكفيني شر الحب لو هيقل

واكفيني شر القرب لو هيذل

واكفيني شر حبيبتي لو هتمل

واكفيها شري ف وقت ما أبقى كتوم

اكفيني شر الفضفضة ومعلش

أو عشمي في الناس اللي غاوية تغش

واكفيني شر الكركبة في الوش

واكفيني شر الإكتئاب والنوم

يا رب خد بإيديا نفسي أقوم

اكفيني شر الإندماج في الحزن..

والإحتياج للحضن

واكفيني شر الوقت لما يضيع

والخلق لما تبيع..

والدمع في التوديع

والطبطبة بنفاق

اكفيني شر الإشتياق..

قبل أما افارق حد أو بعد الفراق!

يا رب كل الزعلانين من غير سبب..

والمؤمنين إن الدُعا هيحل أزمة حزنهم

يا رب كل العثمانين فيك بالقوي

يا رب كل المذنبين وانا منهم

علمني احبك حب متحبش لحد

علمني لما أصلي أتكلم بجد..

أنا قصدي يعني أحس باللي اتقال

واوهد لي صبر كثير وراحة بال

دي الدنيا لو شدت إيديا هتوه

وانت اللي قربك فيه صلاح الحال

\*\*\*



«اطلع بروحك للسما ومدد

ربك كريم جي بالمدد حالاً

فيه حاجات عشان للأحلى تتجدد

لازم كده تهتد إجمالاً»

## خاتمة

عن صاحب دائماً حبيته..  
وقاسمته ف أوضته اللي ف بيته  
ليلة امتحانات تالته تجارة  
وف آخر سنة ف الكلية  
عن حب جديد غير فيا..  
عن سر إيماني بـ «أمنية»  
و«بزهرة» وعن حبي لـ «عادل»  
و«أوتاك» ف وقت ما بيجادل  
أو «سعد» ف وقت ما يتأخر  
عن صاحب عمره ما نيمني  
علشان كان دائماً بيشخر  
وعبيدة ونرفزته الزايدة  
أو «هاني» وروقانه العادي  
عن لمة مسرح جمعتي  
ف الغالب بـ «أسامة الهادي»  
عن «هادر» و«حباطة» و«سمعه»  
واللمة بتاع يوم الجمعة..

وال pes والقاعدة ف «سانسيروا»  
عن حد تملي بفضفضله..  
هو «النشار» ومفيش غيره  
عن دكتور «أحمد» وعيادته..  
اللى انا مش عارف أروحها إزاي  
وأخوه أبو قلب أبيض سكر..  
متقلب فيا وفي الشاي  
عن «مايكل» لما يقوم يمشي  
أو عن «إسلام» لما يجيلي  
عن كل صحابى اللى ف جيلي  
المذكور منهم والمنسي..  
عن عمد سواء أو عن سهوة  
عن كل الناس جوا القهوة  
عن بنت مجاتش ولا هتيجي  
شفتها حبيتها وتدرجي  
حسيت انها تنفع أمي  
بعد امي اللى انا ماسك فيها  
زي الغرقان في القشاية  
حسيت انها تنفع أختي  
زي اختي اللى ف يوم ما بتزعل  
بتطفي النور من جوايا

أو وقت اما بتفرح بفرح  
وبحس خلاص انى اتظمنت  
أو بنتي ف أيامي الجاية

مين داري  
أنا نفسي أخلف

بنت..

منكرش انا نفسي أخلف واد

يمكن «مصطفى»

يمكن «يحيى»

ممکن هيكون «آدم» مثلاً

ممکن منجيبش ولاد أصلاً

أو يمكن أتجوز غيرها

لكن أنا مهما حصل فعلاً

مفضل بشتاقلها وفاكرها!

# الفهرس

٥	مقدمة بخط الشاعر أمير طعيمة .....
٧	إهداء .....
١١	مقدمة .....
١٥	عيش وملح .....
٥١	دمع مؤنث سالم .....
٧٩	المصري اليوم .....
٩٩	الحزن البعيد الهادي .....
١٤٩	أنا وهو وهي .....
١٨٣	مننا لله .....
١٩٩	خاتمة .....